

UTL AT DOWNSVIEW



D RANGE BAY SHLF POS ITEM C

39 10 08 01 09 003 9

PLEASE DO NOT REMOVE
CARDS OR SLIPS FROM THIS POCKET


UNIVERSITY OF TORONTO LIBRARY

DK
888
S83
1873

Su'avi, 'Ali
Hive

2137

13/24



خیوه

۱۲۹۰

فی محرم

« بر کره خیوه‌یی آلبچه اوتہ یانی بزم اولوز
(دلی پترو)

« روسیه دولتک مرادی آسیای وسطی‌یی فقط
فتح ایتمکن عبارت دکل در دلی پترونگ پلاتنی
اجراء ایتمک استر »

(نو فری پرس ۱۴ نیسان فرنگی)

« روس خیوه‌یی فتح ابدہ جک نہ اولہ جق
صداقت و ناموس و شجاعت ایله متصف اولان
اوز بکری روسیه سیویلیزاسیونی دینلان
سر خوشلق حیلہ کارلق دوز تبارلق عادتلرینه
آلش دیرہ جق نصل کہ روسیه ضبطنه کچن
تاشکندہ و مضافاتندہ اورنگی کوریلور »

(ریوبلیق فرانسه غزہ سی فی ۲۶ نیسان فرنگی)

علی سعاوی فی صفر ۱۲۹۰



Su'āvi, 'Alī




Hive

برنجی قسم
روسیدنک آسیای وسطی ده
ترقیسی

ایکنجی قسم
خیوه خانلغی

علی سعاوی



DK
888
S83
1873

مقدمه

اشبو ۱۲۹۰ سنه سی روسیه دولتی خیوه اوزرینه
عسکر کوندردی خیوه اوزرینه کیده جک عسکری
چرکستان و عورنبورغ و ترکستان اردولرندن
حاضر لدیلر بواوچ فرقه روس عسکری فی ۱۵ محرم
یرلرندن حرکت ایدوب ربیع الاول اوائلنده
خیوه حدودنده برلشه جکلر

روسیه نك خیوه بمحاذله سی برچق عصر دنبرو
سورمکده در

دلی پترو دیدی که « برکره خیسوی آلجه
اوتیه یانی بزم اولور » پترو نك افکاری بحر خزرده
کیلر انشاء ایدوب خیوه یی و چیخونی آله رق
روسیه یه هندیولنی آچق ایدی

بوافکاره مبنی در که فی ۱۱۲۹ و ۱۱۳۰ ایکی کره
پرنس بکویچ قوماندانده سنده خیره اوزرینه
عسکر کوندردی

خیره لیلر بکویچی یوزوب در یسنی طبله
کرد کلرینی روسلر پک تقیح ایدوب اوزبکلر
پک وحشی بار بار اولدقلرینه بونکله استدلال ایدرلر
لکن بواسدلال تام دکل در زیرا پرنس بکویچ
ترکدن «دولتکرای» دینلان حریف در که
مسقو عسکرینه قوماندان اولوب هم وطنی
ودین قرداشلرینی روسیه ایچون اورمغه کلدی
اولوقت خیره اوزبکلری دشمن عسکری باشنده
ذاتا کندولرندن اولان بومر تدی کورنجه
غیره کلوب البته عادی جزایه قناعت ایدهمیه جکلری
در کار معلوم در خیره لیلر شو پرنس بکویچ دینلان
دولتکرای مر تدی ایکنجی کیدیشنده طو دقلری کبی
معیتده بولنان بتون مسقو عسکرینی قلیچدن

پیردیلر بکویچک احتیاط واستحکام عسکری که
 بحر خزر کارنده منغشلاق و الکساندر بک
 وقرا سنوودسق ده ایدیلر بکویچ عسکرینه قتل
 عامی ایشدکری بی کیلره بنوب آستراقانه رجعت
 ایلدیلر و اورالرده باشلامش اولدقلری قلاع
 و استحکاماتی یارم براقدیلر

بومصائبدن صکره روسیه بروقت فقط
 کندی قوتله خیویه هجوم افکارینی براقوب
 بحر خزر جهت شرقیه سنده ساکن ترکمانلری
 اله آلق حیله لرینی قوللاندی

فی ۱۲۲۸ کرجستان قوماندانی ریچف
 دربندی موراطوف نام ارمنی تاجری ترکان
 رؤسانی جلب ایتک اوزره ارسال ایتدی مرقوم
 موراطوف استراباد ایله تجارت ایلدیکندن
 او اطرافک بعض ترکان رئیس لر یله معارفه کسب
 ایشیدی موراطوف اولوقت بر بلوک ترکان

رئسی سلطان خانه چاتوب جنرال ریچف
طرفدن هدیه لر اعطاسیله اتفاق لسانلری
قوللانه رق جلب ایلدی سلطان خان خیره
علیهنه برغرضی اولمایوب آنجق ترکانلر اوزرینه
خانلغی "تأسیس برله او" تاققرینه دائمی راحت
ویرمیان عجمه غلبه چالاق قصدنده ایدی
بومقصدده مبنی روسیه دن استعانه سوداسنه دوشدی
نهایت ترکان معتبراندن ارباب دانش "سچوپ
مورا طوف ایله برابر جنزله کوندردی فقط
بومبعوثلر جنزالک مقری اولان قاره باغ کلستانه
او ایله بر وقتده واصل اولدیلر که عجم دولشدن
عقد روابطه کلان مرخص عبدالحسین خان ایله
مقاوله بتمشیدی مرخص مرقوم بو ترکان
مبعوثلرک روسیه حایه سیله عجمه مضراوله جققرینی
آکلادیغی کی جنزله دیدی که «زم دولتمزک
بو ترکانلرله روابطی یوق در» جنزال دخی

حسب الوقت «بزم دولت ترك دخی روابطی یوق در»
 دیوب مبعوثلری بعض هدیہ لر ویزه رك صاومغه
 محبور اولدی بوتصادقی پولیتیکه ترکانلرك
 نظرندہ آلداتمق یرینه کچدیکندن پك کوچندیلر
 ناچار عجمه تابع اولدیلر ایچلرندہ بوتبعیتی
 قبول ایدہ میانلر خیویه کیدوب محمد رحیم خانہ
 تابع قالدیلر سلطان خان دخی اولوقت
 ترکانلریله خیوه طیراغنه کچدی

فی ۱۲۳۵ قوماندان یرمولوف تکرار ترکانلرله
 عقد روابطه تشبث ایلدی الیزابت پول محافظی
 یکباشی پونومارفی بو عقده مأمور ایتدی
 وچکنده لهستان ظالمی جنرال موراویفی (که
 اولوقت ارکان حربیسه یوزباشیلرندن ایدی)
 خیوه خانہ مودتنامه ایله بعث ایتدی بوارسالدن
 اصل مقصد اورالرك خریطه سنی آلق ویولارینی
 کشف ایلک ایدی

فی ۱۲۵۵ انگلیز «لورد عوقلاند» کابلی
 پامال ایتدیکی وقت روسیه چاری (نیقولا) دخی
 خیوه یی استیلاء ایتک استدی و جنرال پروفسکی یی
 عسکره کوندردی (دراخرشوال منه) لکن اوزمان
 خیوه حکمداری بهادرلکه بتون ترکانلری کندویه
 رام ایتش و آسیایه شجاعت صیتی صالمش
 «رحان قولی خان» ایدی روسیه عسکرینی
 تارمارایتدی

فی ربیع الآخر ۱۲۵۶ روسیه عقد مصالحه یه
 مجبور اولدی بوانهزامدن صکره روسیه دولتی
 خیوه اوزرینه حیلده و تجربه ده مهارت کسب
 ایلدیکندن بحیره خوارزم دیدیکمن آراال کولنه
 دونما یامغه باشلادی خیوه خانلری که سیحون
 منبعنه قدر حکم ایدیورلردی روسیه آنلرک اورالردن
 وقاره قلیاق اوزرندن الیرینی کسدی
 روسیه ۱۲۶۹ دنبرو آراال کولنده اوچ یلسکنلی

وایکی تیمور قاپلی واپور یاپدی بو واپورلری
اسوچده یاپدیروب پترسبورغه واورادن سامارایه
وآندن آرالسکییه پارچه پارچه نقل ایتدی
وآرالده طاقدی طاقشدیردی روسیه بو واپورلری
ایشلتک ایچون دون نهریله نقل ایلدیکی کمورک
هر بر طونیلاته سی ۳۰۰ فرانقه کلوردی لکن
ترکستانی ضبط و تشکیل ایده لیدنبرو چکنده
یکرمی ایکی ساعتک یرده کمور معدنی بولدی
بومعدنی واپور ماکنه لر یله اخراج ایدیور

آرال دونماسیله سیچون ضبطنه یاردم ایتدیکی کبی
شمدی ده جیچون یعنی خیوه ققنه یاردم ایده جک در
فی ربیع الاول ۱۲۷۰ (۱۱ کانون اول ۱۸۵۳)

روسیه عسکری برنجی کره اوله رق خیوه یی
فتح ایلدی وفی ۱۲۷۱ امضالتدیغی معاهده
عثمانلی نک قینارجه وعجمک بحر خزر معاهده لرینه
نظیردر

اولوقت خيوه خانى اكر عثمانلى نك روسيه ايله
قرىم محاربه سى اوله جغنى بيلمش اولايدى . بويله مضر
معاهده پي امضالارمى ايدى

اكر اوزمانلر باب عالي ده سياست نظرى
اولايدى روسيه نك قريم ده محاربه ايله مشغول
اوله جغنه دائر خيوه يه بر اشارت بلك ايترمى دى
فى ۱۲۸۶ روسيه قراسنوودسكى قلعه سنى بحر خزر
شرقيه سنده تاسيس ايتدى

فى ۱۲۸۷ بحر خزر شرقيه سنده يكي قلعه لر
بناء ايلدى هراته يول آچدى

فى ۱۲۸۸ چيقشلارى ضبطله مر كز حركت ياپدى
فى ۱۲۸۹ ميرالاي مارغوصوف عسكرى خيوه
اوزينه بو چيقشلار مر كزندن حركت ايلدى

بحر خزر دونخاسنى اكال ايلدى بو بجر ك
جنوب شرقي سنده اتراك نهري اوزرنده دهستانى
(عاشور) ضبطنه آلدى و اتراك و جرجان

وادیلرینی یعنی دهستان و آبسکون آره‌سنی بوکره
عجمدن آلدی بوحوادثی حالیا استانبولده عجم
ایلیچسی محسن خان لوندرده ایکن تکذیب ایتک
استدیسده انکلیز مسئله‌یی میدانه حیقاردی
اوت صحیح‌در روسیه بووادی‌یی آلدی حتی قلعه‌لر
دخی بناء ایتدی و بوگونلرده استرآباد قوینی مرکز
آخاذایتدی دیمک که بحر خزرک سواحل شرقیه‌سی
تا جنوبده استرآباده قدر روسیه‌نک اولدی

خیوه که «خوارزم» قطعه‌سی در فقهان
معراج‌الدرايه صاحب قوام‌الدین و حکیم
و منطق حسام‌الدین کاتی و ائمه لغتدن
ناصرالدین مطرزی و خواجه ابوالسقاء
و پهلوان محمودپوریا و مولانا کمال‌الدین حسین
و علامه صاحب‌الکشاف زنجشیری کی دیگر

قطعه کرده امثال ظهور ایتیان اکابرک وطنی در
 خصوصا حکیم و علامه نجم الدین کبری نك
 مقامی در اوزبك خانلری که بروقت روسیه
 قرالارینی (میشل ثانی . یوریا . دیمتری
 و غیرهم) استدکاری کی عزل و نصب ایدرلردی
 خیره که بروقت آنک حکم ایتدیکی مملکت
 برطرفدن هندستانه و برطرفدن اندجان و ترکستانه
 و برجهتدن عربستانه و برجانیدن رومه قدر
 ممتدا ولوردی

اوزبك خانلری که سلاطین ماضیه انلره
 تدافعی و تجاوزی عقد اتفاق سیاستده امور
 واجبه دن صایدیلر حتی سلطان سلیمان آنلره
 اتفاق ایدوب اوچ یوز یکچیری و طویلر و طویلر
 اعانه کوندردی و مراد ثالث هند طریقله
 سفیرارسال ایدوب مبتدعین علیه استعانه ایتدی
 خیره که (یوقاروده اجمال ایندیگن

تاریخدن اکلانشیله جغی وجهله (بر. بچق
عصر دنیرو روسیه ایله نیچه واقعیاتی کچمش در
خیوه که بوکونکی کونده آسیای وسطی ده
اندن بشقه اسلام سنی خانلق قالماش در آرتق
بویله برقطعه نك احوال حاضر هسی استانبول ده
و بالجمله ممالك اسلامیه ده مجهول قالمق لایق
اولماز . تحریر ایدیم بو تحریری ایکی پارچه
یایدم بر بچی قسم روسیه نك اشیای وسطی ده
ترقیسی قسم ثانی خیوه

قسم اول
روسیه نك آسیای وسطی ده
ترقیسی

اخطار ۱

روسیه دولتی «خیوه» یی استیلایه بریچق
عصر دنبرو تشبث ایلدی
روسیه بر کره طوتمش اولدیغی مسلکی
بردها براقایوب سنه لر عصر لر کچر چارلری
وما مورلری ن کیشور لر هر دایم او مسلکی طتوب کیدر لر
بزم دولت ده ایسه بونک عکسنه در بر صدر اعظم
کلور شویله ییار صکره بشقه سی کلور سلفنک
یایدیغی بوزار آنک یرینه کلان دخی آنی تبدیل ایدر

وہم اجرا برمسلك ده دائم اولمايوب هر كلان بر درلو
 حلواير دوام وثبات يوق در
 روسيه «من ثبت ثبت» فحواستجحه ثابت اولوب
 ثابت اوله يور

۲

شمدی روسيه نك خيوه عسكر سوقندن
 بحث ايدن اكثر غزته لر نه آسپای وسطی ي نه ده
 اوچ درت سنه دنبرو روسيه نك وانكليزك آسپاده
 ايتدكلری استیلاء ترقیسنی بیلدكلرندن ياكلش شیلر
 یازیورلر کیمی روسيه سیحون نه رینی ضبط
 ایده جك یازار سیحونی روسيه نك چوق دن
 ضبط ایتمش اولدیغندن خبری يوق کیمی بو خيوه
 مسئله سنی هندستانه طوقنور کبی شرح ایدر
 نرده خيوه نرده هند روسيه وانكليز برقاج
 سنه دنبرو آسپای وسطی مسلمانلرینی پینلرنده
 تقسیم ایتدیلر انكليز ده ا یقین وقتلرده عود

و نیول و کشمیر و پنجاب و پشاور قطه لرینی
 استیلاء ایلدی روسیه دخی سیحون بویونی
 وزرافشان وادیلرینی طاشکند و خجند و سمرقندی
 استیلاء ایدوب بدخشانه طوغری ایندی شمعی
 انگلیزک مرادی اوزره کوه هند شمالندن حدود
 کسدیکی کی آسیای انگلیزله تقسیم و اسلامی
 فصل ایتیش اوله حق

روسیه و انگلیز آسیا اسلاملرینه راست کله
 حکومت ایتیموب « اسلامی اداره فصل اولور »
 بونی تدرس ایتیشلر نهایت تجربه ایله دیورلر که
 « اسلام دینه طوقنولمالی و حقوقی محاکمه
 عوض سز غرض سز رؤیت ایتلی بوا یکی شرطه
 رعایت اولندجه مسلمانلر روس و انگلیز اللرینه
 دوشمکه تأسف ایتیمورلر » اشته بویله دیورلر

شمدی بز خیوه دینلان خوارزم قطعه سنی
 بیان دن اول روسیه نك آسیای وسطی ده پیدا ایتدیکی
 بو کونکی موقعی اجمالاً تعریف ایدم تا که مسئله
 ایوا کلاشلسون

روسیه اویرده فی ۱۲۸۲ برجدید ولایت
 تشکیل ایتدی آدینی « ترکستان » قودی
 بویکی ولایت شمال دن سبریا و قیرغیز جنوب دن
 خیوه بخارا بدخشان خوقند ویکی کاشغر
 (جنوب دن و کذا شرق دن) ایله هم حدود
 غرب دن آرال کولی ایله محدود

فی ۱۲۸۴ بو ترکستانی روسیه ایکی ایالته
 تقسیم ایتشیدی شمدی ایسه یعنی قوخله یی
 آتالق غازی دن آلدیغندنبرو اوچ ایالت یاپدی

ترکستان

مساحه	عدد	نفوس	کیلومتر و تربعا
سیحون دریا ایالتی	۵۱۲ ۳۳۰	۸۶۵ ۴۶۱	
یدی دریا ایالتی	۳۷۵ ۵۰۰	۴۸۶ ۹۳۷	
قوچه ایالتی	۷۱ ۲۲۵	۱۱۴ ۳۳۷	
<hr/>			
	۹۵۹ ۰۵۵	۱ ۴۶۶ ۷۳۵	

شمدی ترکستان دینلان اشته بوقطعه در اسکی
اصطلاح اولان ترکستان دکل

«خوقند» خوقند خانلغی لفظی مراد
قالدی الیوم حاکی خدایار خانک حکم ایتدیکی پر
اسکی فرغانهک برکوچک پارچه سی در بوده

روسیه نك مساعده سیله . شو كوچك پارچه
دید یكیز سیحون منبعندن خجنده آلتی ساعت
قالنجیه قدر اولان اراضی در

فی ۱۲۸۱ روسیه خوقنده محاربه آچدی
یتش یك نفوسلی طاشکندی واللی یك نفوسلی
خجندی ضبط ایلدیکی کی عوراطوب وزامین
و دیزك شهرلرینی و آق طاسخ اطرافنی آلدی
سیحون چایك صویردیکی اراضی خجنددن
مصبنه قدر (آرال کولی) هپ روسیه ده
شدی خوقند غرب دن و شمال دن و شرق دن
روسیه ایله محصور دریا لکر جنوب دن آتالق غازی وار
خوقند اهاالیسندن قبیحاقلر حین محاربه ده
خدا یاری خیاتله اتهام ایدوب ایاقلان دیلر
خلع ایتدیلر یرینه منلا خانی و صکره آتی دخی
خلعه اوغلنی اجلاس ایلدیلر خدا یار تاج
و تختی اعاده کی بریهوده سلطنت و قوری نام

ایچسون روسیهیه مراجعت ایلدی او حانده
روسیه قوماندانی آنی کتوروب اهالییه رغما
تخته اقعاد ایتدی منلاخان زاده کاشغره
الچاء ایلدی حالیا اوراده در

اشته خوقند جهات ثلثه دن محصور و خدا یار
روسیه نك قوتیه تخت قازانمش بنده اولدیغدن آرتق
آندن اطراف مسلمانلرینه برامداد و اعانه ممکن دکل در
روسیه یاپدیغی تجارت معاهده سنی قی ۱۲۸۵
خدا یاره امضالاتوب (اموال تجارت دن فقط
یوزده ایکی بچق بوندن بشقه بر رسم یوق)
خوقنده بر شهبندر او طور تدی (کاروان باشی
دیورلر) هر شهر روسیه تبعه سنه آچیق اورالده
ایک و پاموق و میوه پک چوق حاصل اولور
روسیه کلیتلو استقاده ایدیور و بونلری
پک اوجوز آلیور خوقند میوه سی روسیه ده
یرالما سندن درت کره اوجوز کلیور

« بخارا » بخارا حكومتك قوتى قالمادى
 روسيەنك خىوہ حسابنہ مبنى مساعدہ سىلہ طورىيور
 بخارا اميرى مظفرالدين فى ۱۲۸۳ محاربه سنده
 (۲۵ يك نفر عام قالدیره بيلشيدى) فنا مغلوب اولدى
 روسيە عسكرىنك طليعہ سى نفس بخارايہ
 ۲۰ ساعتك يقينه قدر كلدى مظفرالدين
 اختلاط و تجارت معاہدہ سنى ناچار امضالادى
 فى ۱۲۸۷ جزال عامبروف ايلہ تکرار عسکر
 کوندر وب سمرقندى وزرافشان واديلرىنى ضبط
 ايلد کدن صکرہ خوقندو بخارا آره سنه کيرمش اولدى
 بدخشانہ تقرب ايلدى



خریطہ ده سمرقندك جنوبندہ كى اراضى يى
 مطالعہ ايدى كز شول اراضى كه شرقا بولورد يہ لرى
 وغربا بخارا و جنوبا كوه ہند ايلہ محدود .

شهر آباد و حصار و فیض آباد (بدخشان) و قوندوز
 (قندس) بوقت عده اورالر فی ۱۲۷۶ هرات امیری
 طرفدن ضبط اولندی امراسی افغانستان دن
 نصب اولنور بعض یرلری بوکونه دك استقلال
 هوسنده بولنان بکمرله اداره اولنمقده ايسه لرده
 بالجمله افغان حمایه سنده لر بخارا امیری بلخ دن
 بدخشانه قدر حق حکومت ادعا سنده بولندیغندن
 افغانه بغض و اورالری تحریک ایدہ کیدیور
 انگلیزک اوچ سنه دنبرو حدود کسمک تکلیف
 ایتدیکی یر بلخ دن بدخشانه طوغری کوه هند
 شمالی در روسیه ایلہ قرار ویردیلر بورادن چيخون
 بویله حدود تعیین اولنه حق انگلیزک بوحدود
 مسئله سی شمدی روسیه نك خيوه یی استیلا سنده
 طوقنور مسئله دکل در

انگلتره ده حوادث تلغرافیه آجمنه سی روتر
 فی ۲۶ کانون ثانی شوخبری ویرمش ایدی

« افغانستانه حکومت ادعاءیدن و روسیه به التجاء
ایلیان عبدالرحمن خان حصار اوزرینه وینه
روسیه به ملتجی سید محمد عیسی خان شهرآباد
هجوم ایله ضبط ایتدیلر اورالری وایلرینی
روسیه عسکرینه تسلیم ایدوب مرکز حرکت
اتخاذ ایلدیلر »

فقط روسیه طریقیله کلان خبرلردن عبدالرحمن
خانك فی ۲۷ مه سمرقنده بولندیغی آکلاشمغله
خبر مذکورك صحیح اولمادیغی تبیین ایتدی
بوراده خاطره بشومسئله لر کلور ۱ انگلیز
کوه هند شمالندن یعنی بلخ دن فیض آباده طوغری
حدود کسنجه دیمک اولورکه روسیه لی نك سمرقنددن
اشاغی اوحدوده قدر یوزاوتوز یوز قرق ساعتک
قطعه بی استیلاء ایتسنه برمانع یوقدر
برکه روسیه بووجهله انگلیزه هم حدود
اولدی می آرتق اورادن شرق و غرب

مسلمانلارینک اتصالی کسلور برخریطه آلوب
 باقیکز مغربده اوقیانوس کارندن یعنی فاسدن
 شرقه طوغری برخط اوزرنده چینهدر بتون
 اسلام ایدی عجم دولتی برقاچ عصرنبرو
 برایکی ملیون نفوس ایله شیعه لقی بدعتی مذهب
 ایدینوب و آروجه بر دین کی سنت وجاعت دن
 آریلوب ایران دینلان قطعه ایله برخط فاصل
 چکش و برایکی یوز ملیون اسلامی بربرندن
 آیرمق کی تاریخلرک لعنه له یاد ایده جگری
 مسلاک تفریق ده بولمیش ایدی شمعی ده بوحدود ایله
 روسیه وانکلیر ایکنجی خط فصل چکه جک
 ایکنجی مسئله که برنجی ایله برلشه یلور شودر که
 روسیه دولتی انکلیرله اولان مخابرات رسمیه سنده
 کوه هندایله سمرقند آره سنده کی طخارستان
 و بدخشان مستقل طانیور قالدی که بویرلری
 افغانستان ضبط ایلشیدی عجا انکلیر کندی

جایه سنده بولسان افغانی تصاحب ایدوبده
اوراری افغانك طایه رق جایه ایده جك می
وحایه ایتدیکی تقدیرده روسیه نه درجه لره قدر
مخالفت ایده بیله جك

۳ شوقطعه بین الحدین بی طرف بر اقلسه
اهالیسی ایلروده روسلرایله بر نزاع چیقاردقلرنده
بوندن انکلیز مسؤل اولمازی
آرتق یکی تشکل ایدن «آتالق غازی» دولتیله
«خیوه» پی تعریف ایدلم

بحر خزرک مشرق طرفنده روسیه جنوبیله
هم محدود ترکمان خیوه بخارا افغانستان خوقند
و یتتی شهر (یدی شهر) دولتری وار یتتی شهر
دولتی چین غربی ولایتلرنده یکی تشکل ایدن
اسلام دولتی در کاشغر دولتی یارکند دولتی
جیان چان (کوه آسمانی) دولتی و حاکمك
اسمنه نسبتله یعقوبك دولتی یاخود عنوانه
اسناد ایله اتالق غازی دولتی اسملریله دخی یادایدیورلر

کاشغر دولتی

آتالق غازی دولتی • بودولتک الیوم
حکم ایتدیکی قطعه شمالا کوه آسمانی و آلتون
طاغلری شرقا چین جنوبا کوه لون غربا
بولور دیه لری ایله محدود

دیگ که شمالنده قال آج و روسیه و خوقند
جنوبنده تبت و انکلیر شرقنده چین و مغول
و غربنده بدخشان و افغان

بو قطعه ده یاقین ده (۱۲۸۲) چین دولتک
ایکی ولایتی اولوب چیان چان نالو و چیان چان پلو
اسملریله یاد اولنوردی اهالیسی اسلام اکثریت اوزره
ترک و عموم لسانی ترکیجه بوراسی دنیاده
هر یردن زیاده انقلاباته اوغرامش در اون درت
ون بش عصرلق تاریخی مطالعه اولسه

هر عصر ده بریکی دولت پیدا ایدہ کلدیکی آکلاشیلور
 قطعہ مذکورہ دن اکمشہور شہر لر
 یار کند ختن (خوتان) اورمپی
 آق صو کاشغر ییلتی شہر (یدی شہر)
 شمدی بویہ حکم ایدن «یعقوب بک» در یازق کہ
 بودولتہ موقجہ ال لازم وترکستان چینی نک کلیدی
 مقاضندہ پک مہم اولان ایلی وقوچہ شہر لرینی
 یعقوب بک ضبط ایدہ مدی بوکا سبب ایسہ
 روسیہ نک فرصت فوت ایتیمہ رک طاورانوب
 بوشہر لر ی استیلاء ایلمسی در

یعقوب بک فصل تورہ دی اجمالا نقل ایدہ لم
 ق ۱۱۷۲ چین فغفوری خان لونغ تبت شمالہ
 کلیتلو عسکر کوندروب مغولی (آکوت قالموق
 دونکان) واصلی ترک و فرس اقوامی تحت
 تبعیتہ آلدی اولوقت اورالردن اسلامیتی
 محواتک املیلہ علمای و امرای طرد ایلدی

ترك علماسى وامراسى بدخشان و خوقنده التجاء
 ايتديلر واورالرى مركزوت ومبدأ حرکت
 اتخاذيله اسكى وطنلرينى اعاده ايجون فرصت
 بولديغه چينلولره هجوم ايدى كلدیلر فى ۱۲۸۱
 ايلي طرفتك دونكانلى قيام ايلديلر طارانجیلر
 دخى آنلره التحاق ايتديلر بوكره بشقه وقتلرده
 اولديغى كى ياتشمايوب چينلولره محاربه ده دوام
 ايلديلر عاقبت قوجله وقورغوس شهرلرندن
 چين مأمورلرينى طردايدوب بالاستقلال مالك اولديلر
 جنوب ولايتنده (چيان چان نالو) بو محاربه اولوركن
 شمال ولايتنده (چيان چان پلو) دخى قان
 آقق ده ايدى شويله كه آق صو قوج
 ختن ياركند طرفلرينك دونكانلى ۱۲۸۰
 ابتدا سندنبرو چينلولره غلبه ايتكده ايدیلر
 چيان چان قيرغيزلى بو قاريشقلى آره سنده
 طاعلردن اينوب كاشغرى ۱۶ ماه محاصره دن صكره

ضبط ایتدیلر یالکز قلعه سی چینلورده قالدی
 عاقبت بومحاهدلرک غلبه سنی اکمال ایچون
 جمع کله ایده جک برامامه لزوم کورندی اشته اولوقت
 بخارادن خواجه بزرک ظهورایلوب طهارت عرق
 واستقامت محقه سی وشجاعت فوق العاده سی
 مسلم اولان « یعقوب بک » ایله برابر کاشغره یوریدی
 برکزه دوشونلسه چینلورده غلبه کوسترن اقوامدن
 باشلوجه لری دونکان طاراجی و قیرغیز
 کبی بیوک طائفه لردن هربری حق استقلال
 دعواسنده ایکن بونلری کله واحده یه جمعه
 اداره واحده آله آلق نه قدر مشکل کورینور
 لکن یعقوب بک شجاعتی وسخاوتی وتقواسی
 وسلطنت قبول ایتمیان ساده لکی بومشکلی حل ایلدی
 هپ طائفه یی رام ایدوب اتحاد و اطاعتی تأسیس
 ایتدی و کاشغره قلعه سنی و یارکندی بالسهموله
 فتح ایتمسینه دخی بوامامته استحقاقنی کوستردی

بر کره اتحاد حاصل اولدی یا آرتق خواجه بزرگ
 یعقوب بکه « سن بوامارتک اهلی سک اشته
 امارتک تأسیس اولندی آرتق وطنی اجانبدن
 تخلیه وظیفه سنی اونوقتہ اللہ تعالیٰ موفق
 بیورسون » دیوب مکہ مکرمہ یه هجرت ایلدی
 اورالرجه بخارا حاکمی « امام المسلمین » عدا اولندیغندن
 حاکم مظفر الدین درحال یعقوب بکه هدا یا رسالیه
 « آتالق غازی » عنوانی ویردی اولوقتدنبرو
 مشارالیه آتالق غازی تسمیه اولنمقده در

روسیه بو محاربہ لر آره سننده فرصت فوت
 ایتیمه رک ایلی وادیسنه وقولجه شهرینه کلیتلو
 عسکرله هجوم ایلدی آتالق غازی روسیه ایله
 طوتشسه ضعف بکیان چینلورله دخی اوغراشه رق
 قوتنی تقسیم ایتک لازم کله جکنی بیلدیکندن
 ناچار سس چیقارمادی ایلی وقولجه کی منبت
 ومعدنلی وترکستان کلیدی اولان شورلری

نه چينلوزن نه اسلامدن برمقاومت كورميه رك
قولايجه ضبط ايتدي آتالق غازي كوه آسماني
دينلان وولقانلي و بوزلي طاغلك روسيه ايله
حدود اولماسنه راضي اولش اولدي

آتالق غازي داخلا دوات اسلاميه يه يي
تأسيس ايلدكن صكره خارج ايله عقد روابطي
مطالعه ايلدي اطرافنه نظرايدوب دكرلرك
حكمداري مقامنده اولان وهنده قرق مليون قدر
مسلمانه حكم ايدن انگليز دولتي ديكرلره بالترجيح
آنكه تجارت واختلاط معاهدسي يايقي استدي
انكليزه اوچ كره سفير كوندروب معاهده تجارت
طلب ايلدي انگليز ايسه بطائت درجه سنه
وارمش «وقار» پوليتيقي سيله بودوات جديده يي
تصديقه مسارعت ايتدي

او تصديق ايتيه طورسون شمال طرفدن
پوليتيقي ده فرصت فوت ايتيان روسيه دولتي

قولجیه کیردیکی کی آتالق غازی نك دولت
 جدیده سنی تصدیق باینده ترکستان والیسی
 قولباری و جنرال قوفانی قیتلی هدایا ایله
 کاشغره کوندردی (فی ۲۱ حزیران ۱۲۸۸)
 و تجارت و اختلاطه دائر معااهده طلب ایلدی
 آتالق غازی بوسفرای سلطنتسز و رسمسز
 ساده لکله و مسلمان تعیرنجه تکرر مسافری کی
 قبول ایدوب حقلرنده مسافر ایچون لازم کلان
 حرمت و رعایتی ایلدی و روسیه نك مقدا
 چین دولتیله یامش اولدیغی تجارت معااهده سی
 صورتنده برمقاوله نامه امضالادی بومقاوله
 کاشغرده روسیه قونسلوسنك اقامته و روسیه
 تجارینك حریتله کلوب کتمسده مساعدده دن عبارت
 وایش بتدکدن صکره انکلیر تجارتجه
 حسده دوشدی روسیه لولر ترکستانك
 هر طرفدن خصوصاً طاشکنددن اتالق غازینك

۱۵۰۰۰۰ نفوسلی اورومچی و ۱۲۰۰۰۰ نفوسلی
 یارکند و دیگر یوزر والیشریکلی شهرلریله
 تجارت ایدوب کلیتلو آلتون و اییک و صوف
 آلمق دهلر یارکنده دهها یقین اولان هندک
 بو تجارت دن تبعادی انگلیزه چوق ندامت و پردی
 ایکی سنه دن برو بو تجارتی ککشاده واسطه لر
 آرامق ده قالدی و روبرت شوو نام قومیسرک
 عرض ایلدیکی لایحه لرله مرامنه واصل اولوب
 اشبو ۱۲۹۰ سنه سی محرمنده آتالق غازی ک استانبوله
 چکن مبعوثیله تجارت و سفارت معاهده سنی یاپدی
 شمدن صکره انگلیز یارکنده بر سفیر کوندره جک
 آتالق غازی ده قالدی کوهیه بر سفیر ارسال ایدجک

قسم ثانی
خیوه خانلخی

موقع

خیوه بزم گابلرده «خوارزم» اسمیه مشهور
قطعه در خیوه اوقیانوس اورطه سنده برآطه کی
چول میانه سنده واحات در بوواحات شمال دن
ارال کولی و شمال شرقی دن جیحون بویی
و جنوب شرقی دن بخارایی فصل ایدن چول
و جنوب غربی دن تکه ترکمانلرینی آیران چول
و غرب دن کذا چول که بحر خزره قدر ۲۰۰ ساعتک
ممتدا ولور دیمک که خیوه واحاتی شمال دن جنوبه
۴۵ و شرق دن غربه ۴۰ ساعتک قدر وسعتده
برقطعه در

چولده بعض واحات دخی واردرکه آنده
 ساکن اولان تکه ترکانلری و بحر خزر کنارنده
 آتا ترکانلری و کذا منغشلاق چاوداری و حسن
 ایلینک عشأری و حیچونک جهت شرقیه شمالیه سنده
 روسیه حدودنه دک قاره قالیقلر هپ خیوه خانک
 نفوذی آلتده لر بناء علیه دینور که خیوه خانلغی
 شمالدن آرا لکولی و غیرغیر چولی شرقدن بخارا
 جنوبدن افغانستان و خراسان غربدن
 بحر خزرایله محدود

خیوه نك استحکامات طبیعیه سی اطرافنده
 اولان چوللاردن بوچوللر ترکان آتلرندن
 و دوه لرندن بشقه واسطه ایله کچیله من
 خیوه حیچون چایله صولانور یا غوریك نادر
 حیچون الیوم اوزبک لک امین دریا دیدکلری درکه
 عجملر آب آمو و اورویالیلر آمودریا یازارلر
 حیچون ایام قدیمده ایران ایله توران ییننی فصل

ایدوب بحر خزره دو کولدیکی کتب عتیقه ده محرر در
 شمدی مصبی آراں کولی ایسه ده اسکی زمانه
 اور کنج اوزرندن شرقه دونه رک بحر خزره قدر
 یتاغنی کشف ایلدیله اسکی کابلرده
 کوریلان داودان قلعه سنک قزیل قلعه نك
 شه سنه مک و ختن قلعه سنک خرابه لری
 بواسکی یتاق بوینده نمایان در و بویتاقله
 اهل جغرافیا ظن ایتدیله که کتب عتیقه نك
 روایتی وجهله بحر مذکوره دو کپلورمش
 خیره لیلرک آباواجداد لرندن نقلرینه کوره
 جیحون چایی بوندن فقط بش عصر اقدم
 و ابوالغازینک یازدیغنه کوره بوندن فقط ایکی عصر
 مقدم بر حرکت ارضله شرق یتاغنی دکشدیروب
 شمالده بحیره خوارزمه دوغش بوایسه صحیح اوله ماز
 زیرا بوندن الییدی عصر اقدم اهل جغرافیا
 (تقویم البلدان و مشترک وقانون و نزهة المشتاق
 مؤلف لری) جیحونک ارال کولنه منصب اولدیغنی

جیچون اوزرنده بیوک صالار و دومنلی جسیم

۱ خیوه لیلرک بویابده هنزلری مصر یاری کچمش
نیل ایچون جیچون دن چوق درس آله بیلور
مصره اهالینک انتخایله بحق رئیس اولان
بیوک محمد علییه قدر کیمسه نیلی سدايله شیشیرمک
مسئله سنی دوشونمادی مع هذا یامش اولدیغی
برقنطره حاجته کفایت ایتدی قالدی که نیل
بحر سفیده طوغری هر بر میل (انکیزی) ده بر بچق
قدم انیش ایله آقدیغندن سدارله شیشیرلسی کوچ
دکل درو سدر یوکسک یاپیلوب سطح نیل ۶۰ قدم
قالدی رله شلات دخی قالماز بوصورته نیل
مصری قات قات منبت ایدر و بحر سفید دن
سفینه لرله کیریلوب غوندوروقه یه یغنی درت بش
عرضنه قدر کیديله بیلور

معونه لرایله بخارا تجارتی ایدرلر قنالرده بیوک
 سازان بالقیری بولنور نفس خیومک جهت
 غریبه سنده صاری بابا جبال متسلسله سی پک یوکسک
 دکل جیحون شمال شرقیسنده شیخ جلیل طاغی
 ارال کولنه طوغری ممتد قوبا طاغی کذا
 شمالده و شیخ جلیل خدا سنده در شیخ جلیلده
 اورمان التون کموش قورشون کوکورت و براز
 باقر معدنلری موجود جیحون قوملرنده آلتون
 توزی بولندیغنه دأر حکایه هر نقدر دلی پترو
 اینانخسسه ده ثابت دکل

خیوه یاز پک صیچاق و قیش پک صغوق اولور
 هله چولده روزکار اکسک اولمادیغندن قیش
 سیاحتی مشکل در
 امام تعالی (لطائف المعارف) خیوه برودتی
 وصفده شونی سویلش در

تعالی

لله برد خوارزم اذا کلبت
انیا به و کست ابداننا الرعدا
فالشمس محجوبة والريح مدمية
جلود قوم اضاعوا الصبر والجلدا
فالماء مستحجر والکلب منجر
والزمهریر يسوق الصرد والصردا
فلو تقبل معشوقا مخالسة
رأيت فاك على فيه وقد جدا

خیوه هواسی یک سالم در وبا و طاعون
وقولا اوراده معلوم دکل هی شهر لر و کویلر
باغلق و بغچه لك اولوب خیوه اطرافی برقاج
مرحله اشجار مثمره در

چولده حیوانات وحشیه دن قورت دلكو
و چقال چوق برنوع یرفاره سی وار که خیوه لیلر
کیریچی دی-ورلر عادتاً کدی ییو کلکنده

اوک ایاقلری قیصه تویی سیاه قوم ایچنده یشار
جیران ویک یک چوق شکارچی قوشلردن
قارطال طوغان شاهین کثرت اوزره خیوه ده
المعتبر آوقوشی قیش قاطاق در

اهالی

خیوه اهالیسی درت قوم دن مرکب
سارت اوزبک ترکمان قاره قالیاق
«سارت» فی الاصل فرس دن در بلخ و بخارا
و خیوه نك اصل یرلیلری سارت ایدیلر بونار کندیلرینی
تاجیک تسمیه ایلرلر مغوللر سیراق دیرلر سارتلر
شهرلرده و قصبه لرده ساکن اولوب تجارت
و صرافلق ایدرلر هپ عقل و حیه لری
نه طریقله اولور سه اولسون پاره قزانمغه مصروف در
بونلرک نفوسی ۱۱۰ ۰۰۰ تخمین اولنور

«اوزبك» اوز غوز اوغوز في الاصل
بركلاه اولوب براسكي خانلری اسمندن مأخوذ
اويغور بونلردن آل عثمان و ماجار دخی
في الاصل بو تركلردن شمدي بلخده بخاراده
(بر بچق مليون اوزبك) خيوهده خوقنده
بلوط طاغی جوارنده حكومت اوزبكلك
الرنده در

اليوم خيوه اوزبكلى شودرت عشيرتدن مركب

۱ اويغور نايمان

۲ قانغلى قبياق

۳ قيات قنقرات

۴ نكوز منغت

خاندان حكومت قيات قنقراتدن . اليوم

خيوه اوزبكلى ۷۰ بك نفوش عداولنه يور

«تركان» بواسمك ماخذنده درلوتو جيهرلر سويلرلر

نشرى يه كوره ترك و ايمان كله لرندن تركيب مزجى در

غالباً ترك كومان تخفیفی در كومان تری ديك
 كویله ده و چفته كلرده ساكن اولان تركمانلر ۱۵۰ يك
 نفوس « قاره قالیاق » ماورای جیحونده
 بر قسمی حیوانات ایله تعیش ایدر بر قسمی
 ارال جنوبنده چفت سیرر ۱۲۰ يك نفوس
 بونلردن بشقه خیوه ده اللی آلتش يك قدر عجم كرن
 و روس اسیرل وار (روس درت بش يك
 تخمین اولنه یور) قیرغیزل ارالق ده ایاقلا نوب
 روسلرله محاربه ایدرلر طوتدقلری اسرای
 حریه پی خیویه و بشقه یرلره كتوروب صاتارلر
 تركمانلر دخی عجملرله اولان محاربه لرده طوتدقلری
 اسرای خیویه صاتورلر

روس اسرای حریه سندن خلیسی اسلام
 اولش واسلامدن تأهل ایدوب فاملیا صاحبی دو
 خاك بوروسلردن متعدد مقربلری واردر و سنی
 اولان عجملر دخی دولت خدمتنده استخدام اولورلر

خیوه لیلرک قیرغیزلردن و ترکمانلردن صاتون
آلدقلى نه قدر اسرا و ارایسه هر برینه بر بدل
تعیین اولمش در یامکاتبه طریقله یاخود
فاملیاسی جانبندن پاره کتیرتمکله تأدییه بدل ایدن
حر در (۲) قیرغیزلرک طوتوب کتیردکلى

۲ اسارت فی الاصل شریعت ده جزای شرک ایدی
زمان اخیره جزای عجز اولدی مع هذا « اعدایی
صکره اقرباسنه صاتقی ایچون صاغ طوئماعه
چالشمق » قان محافظه سنه چوق خدمت ایتدی
معلوم اسلام انه دوشان اسرا

دیگر اهل ادیان النده کی اسیرلرکی خور و حقیر
دکل درلر بوندن چند سال اقدم آمریقایلر
اسیرلری پرانقه ایله چالشدیرلردی انکلیرلر
جمهوریت اعلان ایتدکلرنده (قرومول و قشده)
آلتی بیک اسقوچیا لی بی « بونلر قراللق طرفدارانی »
دیو لوندره ده مزاد ایله بیع ایتدیلقالدى که وطنلرنده

روسلردن هر بری ۸۰ طلا بدل ايله ساتلدیغندن
 بش بیک روس وارا یسه بش بمچق ملیون فرانق ایدر
 دیمک که خیوه خانک طوغریدن حکم ایتدیکی
 سکنه ۵۰۰ ۰۰۰ نفوس قدر بونلردن بشقه قبائل
 وعشائر وار

بجر خزر شرقنده ترکان قبائلی شونلردر (۱)

خیمه	اسماء قبائل	مواقع
۸ ۰۰۰	چاودور و حسن ایلی	منغشلاقدن خیوه یه
۱ ۰۰۰	آتا	بلقانندن خیوه یه
۳۰ ۰۰۰	تکه	اترک اطرافنده
۴ ۰۰۰	سالور	تکه شرقیسنده

براقلمق اوزره دکل تا آمریقاده کی انکلیرلرک
 اراضیسنه خدمت ایتک شرطیله ساتدیله
 ۱ ذکر اولنان قبائل دن هر بری جوق شعبه ره
 تقسیم اولنور

سارق	۳۰ ...	کذا
یومرولی	۳۰۰	سالور شرقیسنده
یموت	۴۰ ...	اترك وجرجان
		اوزدرلنده
کوکلان	۴۰ ...	کذا
ایرساری	۱۰۰ ...	بخارا طرفنده
صاقار	۲۰ ...	کذا
اویماق	۸ - - -	خراسان طرفلرنده
<hr/>		
	۳۴۳ ۳۰۰	

هر خیمه بش نفس حساب اولنسه

۱ ۷۱۶ ۵-- نفوس ایدر

بونلردن بلکه بر میلیونی خیمه خانلقنه تابع اولدیغندن

دیگر بش یوزیک ایله جعّا خاّك نفوذی التّده

اولان نفوس بر یچقّی ملیون اولور

* خیمه نك مشهور شهری لری

«خیمه» استراباددن ۱۴۰ ساعت خاّك مرکز

اقامتى در جیخوندن ایکی قنال اورطه سنده
 بناء اولمش ایکی حصاری وار ایکیسی دخی درت
 گوشه لی اییح حصارک هر یوزی ٦٥٠ مترو
 یعنی چوره سی ٤٠ دقیقه لوقدر بو حصارده
 بش محله و اوچ قپووار خانک سزایاری بونده
 باب شرقی یاننده

طیش حصارک چوره سی بر ساعت ٤٠ دقیقه لوق
 طقوز قپوسی موجود ایکی حصار بیننده
 یعنی واروشلرده بش محله وار و بالجله خیوه ده
 ٤٠٠٠ خانه ٢٠٠٠٠ نفوس ١٧ جامع
 ٢٢ مدرسه ٢٦٠ مغازه ٢ کاروان سزای وار
 ابنیه طیراقدن کریمخدن فقط طاش بناء اوله رق
 ٢ جامع بر مدرسه و بر تجار بورس سی موجود
 خیوه نك اولو جامعی و مناره سی فن ابنیه جه
 یك ظریف وشایان تحسین در

قدوة المشایخ ابوالجنا ب احمد بن عمر بن

محمد الخیوقی بوشهر دزد در وفاتی فی ۶۱۰ تقریباً
و کذا علامه شهاب الدین الخیوقی محمد خوارزمشاهک
شیخ الاسلامی مقامنده اولوب ممالک محکومہ نک
هر طرفنده قاضی ومفتی آنک امتحانیله نصب
اولنوردی

«جرجانیه» خوارزم . اور کنج . کر کنج
دخی دیرلر سلفده بغداد و بخارا کی
امهات مداندن عدا اولنوردی الک مشهور
اهل نظر (متکلمین) بوراده تحصیل ایتدی
خوارزمشاهان وقتنده او یله بیوک و معمورایدی که
سلطان محمد بن تکش برکه حربده منہزم اولوب
بش اون اتباعیله اور کنج لایلا کیردی صباحیسی
او توزیک سواری ایله چیقوب اعدایه قارشو کندی
علامه زمخشری (ربیع الا برار) بوجرجانیه نک
فضائلی حقنده غریب غریب شیلر یازمش در
حتی احادیث دخی نقل ایدر زمخشری بوراده

وفات ایتدی فی ۵۳۸ شونکر ایتدی کمز
 جرجانیه کر کنج کبری دیرلر فی ۶۱۰ تاتار
 خراب ایتشیدی «کر کنج صغری» کر کنج جدید
 الیوم بتون خانلغک مرکز تجارتی در پک چوق
 خانلری ومغازه لری اولوب خیوه تجارتینک بخارادن
 ادخال ایتدکری و روسیه یه اخراج ایده جکری
 بالجه اموال تجارت هپ اوراده مغازه نور
 دور اولنور تحمیل ایدیلور سوقاقلری یوکلره
 دوه لرله حاللره دللرله بازاراق کسیشان
 تجارت طولودر بیوک پایتخانلرک بورسہ لرلی کی
 غلبه لاق در سکنه سی --- ۳ نفوس
 «کات» بوشهر سلفده مولد علماء ومقر حکماء
 ایدی بوکون تجارتجه مشهوردر خصوصاً
 قیرغیز آتلرینک بازار یری در
 زمخشر کات قریه لرندن ایدی
 «هزاراسب» ایکی قنال اورطه سند، جزیره کی در

عالمه و فاضله رحمة بنت ابراهيم بوشهر دین در
وفاتی فی ۲۶۸ سلفده قلعه سی متین و مستحکم ایدی
اتسز شاه عسکر مغولدن بوزلدقده بوراده
تخصین ایتشیدی الیوم ۲ یک سواری عسکر چیقار
«سواد» قیرغیزایله تجارت مرکزی برشهر
مستحکم در --- ۲ سکنه سی وار
«کورایان» بودخی تجارت مرکز لرندن

خانک یک چوق یرلرده قصرلی وارد در هر قصر
قلعه داخلنده اولوب خارجی خانه لرله معمور
اولدیغندن قصبه مقامنده در قیچاق قوناقدار
آق سرای خان قلعه سی و دیگر لر هپ بو قیلدن
امراء واعیان و خاندان دن هر برینک چقتک
قوناغی محکم حصارلی اولوب اطراف اهلینک
خانه لر یله معمور قصبه در

تاریخ

فی ۲۸ امیر المؤمنین عثمان عبداللہ بن
عامری (رضی اللہ عنہما) بصرہ والیسی
نصب ایلدی فی ۳۰ خراسانی قتیجہ کندی
وماورای نہر حاکم لیلہ عقد مصالحہ ایلدی
یزید بن معاویہ وقتندہ اهل خوارزم خراسان
والیسی سلم بن زیاد ایلہ در تیوز بیک در ہمہ مصالحہ
اولدی لر سلم نہر جیحونی مقاطعہ ایلہ
ادارہ ایلدی

حجاج خراسان و عراقین والیسی ایکن
یزید بن مہلب خوارزمہ غزایدوب غنائم و اسراء
آلدی

قتیبہ بن مسلم الباہلی خراسان والیسی اولدقدہ
خوارزم حکمداری خرزاد ایلہ قزنداشی بدیندہ

ملك غوغاسی وارایدی خرزادك قرنداشی اسلام
حکومتشه عرض تبعیت ایدوب حایت طلب ایلدی
قتیبه قرنداشی عبدالرحمن ایله خوارزمه عسکر
کوندردی خرزاد مغلوب ومقتول اولدی
قرنداشی خوارزمه حاکم نصب ایدلدی لکن
اهالی آنک اداره سنی بکنم دکلرندن قیام ایدوب
اولدر دیلر قتیبه کندینک دیگر قرنداشی عبدالله
حضرتی خوارزمه نصب ایتدی اشته اولوقت
خوارزم برنجی کره اوله رق اسلام عربدن حاکم ایله
اداره آله کیردی وخراسان ملحقانندن اولدی

ترکان و اوغوز و اوزبک هپ برترک
فاملیاسندن ایدیلر

اوغوزلرکه سیحون و جیحون آره سنده ساکن
اولورلردی طاغ خان اولاندندن خانلری
« سالور » فی ۳۵۰ اسلام ایله مشرف اولدی

آنکه برابر ایکی بیک فاملیا اسلامه کلدی سالور
بعدالاسلام «قاره خان» اسمنی آلدی واسلامه
کلان اوغوزلره «ترکان» تسمیه ایلدی

سالورایله اسلامه کلان ترکلر بحر خزرک
جهت شرقیه سنه و جهت غربیه سنه هجرت ایدوب
ساکن اولدیلر بونلره حسبالمواقع شرق
ترکانلری و غرب ترکانلری دینیه کلدی

قاره خان دن صکره اوغلی موسی خان
اطرافک علماء و مشایخی جمع ایدوب
مسجدلر مکتبلر خانقاہلر یاپدی بونک وفاتندن
صکره عموجه سی بوغراخان هارون خان اولدی
حکومتی شرقدن کاشغر بلاساغون و تاجین
حدینه توسیع ایتدی وفی ۳۸۹ بخارای
عجم سامانیه الندن آلدی آندن صکره
احمد بن ابی نصر بن علی خان عبده اصنام
ترکلره جهاد ایلدی و چوق فاملیلری اسلام ایدوب

شرکدن قورتاردی بعده قزنداشی ارسلان
 خان ابوالمظفرکه «شرف الدوله» دیو مشهوردر
 فی ۴۰۹ بتون ماورای جیحونی بحرخرزهر قدر
 فتح ایلدی وفی ۴۲۳ کوچدی ارسلان
 خاندن صکره بوغراخان اوغلو یوسف قادرخان
 « لا اکراه فی الدین قد تبین الرشد من الغی »
 فحوای شریفنی طتوب مسامحه مذاهب ایله
 مشهور اولدی و اوغلی قادرخان یرینه کچدکده
 فی ۴۳۸ برادری محمودله برلکده تسمیم ایدلدی
 آندن صکره « سراولما یئجه پای پایدار اولماز »
 فحواسنجه نظام اتحادری مختل اولدی قاره خان
 حکومتی اولوقت سمرقندخانی طغماج خان الله کچدی
 و طغماج خان فاملیاسی آل سلجوق ایلله قارشدی
 شویله که شمس الملک بن ایلک خان بن طغماج
 آپ ارسلانک کریمه سنی تزوج و کندی همشیره سی
 ترکانی ملک شاهه تزویج ایدرک بر فاملیا اولدیلر

کلام خوارزم شاهانه که اور کنج پادشاهلری
 بونلرک برنجیسی ترکدن نوشتکین در
 سلجوقیه طرفدن خوارزم شاهى نصب اولندی
 بونک قاملیاسی فی ۴۹۰ عراقه وماورای نهره
 بالاستقلال حکومت ایتکه باشلایوب طقوزشاه
 ۱۳۸ سال سلطنت سوردیلر بونلردن علاءالدین
 ماورای نهره دخی مستولی اولدقده آل عباس
 خطبه سنی خراسان دن وماورای نهر دن قطع ایلدی
 بوقاملیا قاغیللی (قانغلی) ایله قارشدی
 شویله که تکش پادشاه قاغیللی اولولردن برینک
 قیزینی (اسمی ترکان) آلدی مشهور سلطان
 محمد جلال الدین اوقیزدن دنیایه کلدی بوسبیدن
 آنک زماننده قاغیللی اکثریت اوزره اسلامه کلدی
 بونلردن سلطان حمده کلوب عسکر اولان اللی
 آلتش بیک نفوسه بالغ ایدی ترکستان و بخارا
 پادشاهلرینی بوقاغیللی بکلرندن تعیین ایتدی

آخر شاهان محمد جلال الدین ایدی که دنیاده
 یکن الشانلی حکمدارلردن معدوددر مملکتک
 برطرف هندستان و بریانی اندجان و ترکستان
 و برجتهی عربستان و دیگر جانی روم ایدی
 دولت عثمانیه یی تأسیس و تشکیل ایدن
 عثمان غازی نیک جدی شاه سلیمان بن آلب قیا
 اشته بو محمد جلال الدین خوارزم شاهک بکلرندن
 اولوب طرفندن مرو و محافظی ایدی دغین
 و غیبون نام مورخلره کوره آل عثمان خوارزم
 ترکلرندن اینمشلر .

خوارزمک و عراقک علوم و معارف و صنایع جه
 الپارلاق تاریخی اشبو خوارزمشاهان زماننده در
 خوارزملیلردن بر فاملیا فی ۶۱۰ هندستان ده
 دلهی حکومتی تأسیس ایلدی بو شعبه الی ۸۰۱
 باقی ایدی

خوارزم شاهان دن و مغول استیلا سندن صکره

خیوه قطعه سی خراسان ملحقانندن قالوب هرکیم
 خراسانه حاکم اولورسه خیویه برداروغه کونده
 کلدی و برخیلی زمان قیچاق دولتی ممالکندن
 معدود قالدی

طقوزیحی قرنده ماورای نهرده شیان بن جوجی
 بن جنکیز اولادنندن دولت اوزبیکه ظهور ایلدی که
 شبانیه و شبیکه دخی دیرلر

بونلر شیان نسلندن ابوالخیر اولادی در
 ابوالخیر علامه اولوغ بکک همشیره سنی تزوج ایدوب
 تیمورلنک فاملیاسیله قرابت کسب ایلدی

ابوالخیرک بیوک اوغلی شاه بوداق و آنک بیوک
 اوغلی شاعر و ادیب محمد شاه بخت (۱) که
 بیوک جدی اسمیله شیان مخلصنی آلدی

۱ شاه بخت اشبو محمد شیان در
 بزم تاریخلرده ابوالخیره شاه بخت و شاه بخته
 شاه بی بک دیدکلیری یا کلش در ظن ایدرم

اشته بود ابو الخير وقتنده جوجی بن جنکیز اولادندن
 برده یادکارخان وارایدی که بونک اولادی مستقل
 خیره خانلغی تشکیل ایتدیلر بویادکارخان
 قاملیاسی بزم واوروپانک مورخلرینه بمجهول قالدی
 واکر خیرهخانی ابوالغازی اون برنجی عصرده
 شجره سنی یازمامش اولایدی بلکه الی یوم القیام
 بینمزدی

بومجهولیتنه بناء وخیومک تاریخ و حکومتی
 اجمالا بیان قصد ایلدیکمدن دولت یادکاری تحریر
 ایدیم بو تحریر آره سنده سلاطین عثمانیه نک
 آسیای وسطی ایله عقد و حل اولمش بعض روابطنه
 دخی اشارت ایدرم

خیوه ده یادکار حکومتی
و اوزبک خانلرینک
سلاطین عثمانیه ایله
مناسباتی

یادکار بن تیمور شیخ بن حاجی تولی بن عریشاه
بن فولاد بن منکو تیمورخان بن باداقل بن جوجی خان
بن جنکیزخان

ویادکارک درت اوغلی واریدی بیوکی بورکه
ایکنجی ابوبک اوچنجی آمنک دردبجی ایاک
بورکه خان ابوالخیره سرعسکرلک ایتدی
شجاعته مشهور و معروف ایدی شاه بنت
بروقت بورکه خانه محبت اظهار ایتدکن صکره
برکون غافلا باصوب قتل ایلدی
بو بوراده قالسون .

ابوالخیر وقتندہ خراسانہ و خوارزمہ حکم ایدن
 سلطان حسین میرزا ایدی حسین میرزا نك وفاتندن
 صکرہ شاہ بخت خراسانی آنك اوغلارندن آلدی
 و خوارزمہ داروغہ کوندردی بوندن بش آتی
 ییل صکرہ قزیلباش شاہ اسمعیل خراسانی آلدی
 وقوعبولان مروہ محاربہ سنده شاہ بختك فصل
 تلف ایدلدیکی و شاہ اسمعیلك آنك کله سندن نہ درلو
 جامی انشان ایلدیکی بزم تاریخلرده تفصیل
 اولمخس در

بوندن صکرہ شاہ اسمعیل خوارزمہ اوچ
 داروغہ کوندردی بری خیوہ و ہزاراسبہ
 بریدہ اور کنجہ و دیگر وزیرہ
 اور کنج داروغہ سنك اسمی «سبحان قولی»
 اصلی عرب ایدی وزیر داروغہ سنك آدی
 «رحمن قولی» خیوہ و ہزاراسب داروغہ سنك
 اسمی لیلیورز «رحمن قولی» وزیرہ و وصولندہ

اکابر و اعیانه ضیافت ایتدی بوضیافته هرکس
کتدی فقط ترك «قاضی عمر» تمارض ایدوب
کتمدی و ایرتسی اوچ درت اکابری چاغرتوب
دیدی که (۲) «ینکی کیلکان حاکم ینک
برکان سروپای قوتلوق بولسون و ینکی دینکر
هم قوتلوق بولسون»

اکابر «ینکی دین تیکانینکر نه بولور»
قاضی «هنوز کاچه پادشاهنکر شاه اسماعیل ینک
و بو حاکمینکر ینک نه دین و مذهبی بارینی ایشما
دیکر مو» اکابر ایشتمدکلرینی بالبیان
«بزکا هر نچه یلدا هرکیم خراسان پادشاهی
حاکمی بولسه اندن داروغه کلور بزمونی
هم شونداق خیال قیلاتورورمیز»

۲ بومکاله خیوه خانی ابوالغازینک اوشالندن
عینله نقل اولندی . «سروپا» خلعت دیمک در

قاضی « اۈن اۈچ اۈن دۈرت ییل بولدیکم
 شاه اسماعیل بومذهبنی اختیار قیلغالی بوبر
 باطل مذهب تورور (بطلانی بربریان قیلقدن
 صکره) حالا بوداروغه نینگ کشی سی آز
 بزکوب قورقاندین ظاهر قیلای تورور
 برنچه کون تورغاندین سونک اختیارینکزی
 الغاندین سونک اول سز اکابرلرکا سب صحابه نی
 تکلیف قیلور سیرلارنی اوزونیک قیلغاندین
 سونک عامه عه تکلیف قیلور قیلغانی اولتورور
 تیزغینکزی یماسنکز مسلمان لیقدن آیریلوب کافر
 بولدینکز »

وزیر اکبری بونک اوزرینه شاه اسماعیل
 داروغه لرینی طرۈد افکارنده اولدیلسه ده
 دۈرت بش ییل کچدی برشیئه قرار ویره مدیلر نهایت
 سید آتانسندن حسام الدین قتال نام بهادری
 ریاسته دعوت ایدوب پیعت ایتمک استدیله

دیدیلرکه « سزنی پادشاه قیلالی قیزیلباشنی
قبرالی »

حسام الدین « منینک پادشاه بولورومغه
خلق بوکون قایل بولسه تانکا قایل بولمازلار
اگر سزلار بوایشنی راستنیکزیرلان قیلور بولسنکیز
من بر یخشی اصیل پادشاه تایب براین »
وزیر اکبری بوله جفی پادشاه کیم در آدی نه در
سؤال ایتدیلر حسام آره لقی ده اوزبک ایچنه
واروب حوادث آکور ویوؤ فاملیالری بیلور
اولدیغندن بورکه خان اوعلی ایلبارص خانک
اصلنی وشجاعت وبسالتنی بیان ایله خلق اقناع
ایلدی ایلبارصه آدم کوندروب خیوه خانلغنه
تعوت ایتدیلر

ایلبارص کوچک قرانداشی بالباص و براز
آدماری ایله آتلانوب کلدی وزیر اهالیسی
ایلبارص یاقلاشدقده بالخابره هپ قزیلباشلری

لیلا قتل ایدوب صباحیسی یکی خانی ایچرویه
آلدیلر اولوقت وزیر مضافتی یکی شهرایله
ترسک دن عبارت ایدی

اشته خوارزمده اوزبک حکومتی اشبو جنکیر
اولادندن ایلبارص بن بورکه بن یادکارایله باشلادی
بویدایت سنه ۹۱۱ وقوع بولدی

ایلبارص خان وزیرده اوچ ماه اقامتدن صکره
اورکنج اوزرینه حرکت ایدوب سبحان قولی عربدن
محاربه ایله آلدی اوراده محاربه وقوعنه سبب
اورکنج اهالیسی شاه اسماعیل داروغه سندن
ممنون اولوب حتی ایچلرندن بعضیلری سبب صحابه
دخی ایتمشلردی

خیوه وهزار اسبده عجم چوق اولدیغندن
ایلبارصک قوتی قححه کافی اوله مادی اولوقته دک

خارادہ عوجہ لری ابوبک و آمنک (۲)
 وایاک ہپ اولش لرقط ابوبک و آمنک اولادی
 وارایدی ایلبارص خارادن عوجہ سی
 اوغلارینی دعوت ایلدی آنلر ایللریلہ عشرت لریلہ
 کوچوب اور کنجہ کلدیلر ایلبارص خان
 وزیری آلوب اور کنجی ہونلرہ ویردی آمنک
 اوغللری خیوہ و ہزاراسب وکاتی وخراسان
 اطرافندہ مہینہ و درون شہر لرینی عجم دن آلدیلر
 وخراسان دن بحر خزر ساحلندہ منغشلاقہ قدر
 حکم ایدر اولدیلر اولوقت خوارزم اداره سنی
 ایکی قطعہ یہ تقسیم ایدوب برینہ خراسان اتکندن
 استرآبادہ قدر « طاغ بوی » واور کنج قطعہ سنہ
 « صوبوی » دیدیلر

۳ آمن مغول لسانندہ جان معناسنہ ک
 حرفی ادات تصغیر آمنک جانمحق دیمک

- ۱ ایلبارص خان بن بورکه خان بن یادکار
جلوس ۹۱۱
- ۲ سلطان حاجی بن بالبارص بن بورکه
- ۳ سلطان غازی بن ایلبارص
- بواوچ خان وزیرده اوتوردیلر آنلردن صکره
کلانلر اورکنجهده سلطان غازی بی بریل
خانلق دن صکره ضعفندن ناشی استغایه مجبور
ایتدیلر وطاغ بویونی ویردیلر دین محمد بن اوانش
بن آمنک آنی قتل ایدوب طاغ بویینی ضبط ایلدی
مروهده حکومت تشکیل ایتدی
- ۴ حسن قولی بن ابوبک
- ۵ سفیان بن آمنک

غریبه

بونك وقتنده ابوالخان ترکانلری سفیان طرفدن
 زکات طویلاما عه کلان قرق عاملی قتل ایلدیلر
 سفیان بوقتله اجرای جزاء ایچون اوزدرینه
 عسکر چکدی ابوالغازی کابنده سفیانك
 اور کج دن ابوالخانه راه عزیزمتنی غریب تعریف ایدر
 دیرکه اولوقت جیحون اور کج قلعه سنك دیندن
 دونوب ابوالخان طاعنك جهت شرقیه سنه وارر
 وطاغ دیندن جنوبه چوزیلوب صکره شرقه
 اوغورجایه و اورادن مازندران دکنینه
 (بحرخزر) دوکیلوردی جیحونك ایکی طرفی
 اوغورجایه قدر مزرعه و باعلق و اغاجلق اولوب
 يك معمور و مسکون ایدی شویله که پیشگاه دن
 قوری کچیده قدر صویك ایکی طرفده آداقلی

وخضرلی و قوری کچیدن ابوالخان طاعنک
 غریسنه دك ايکي طرفلی علی ایلی و اورادن
 مصبی دکره قدر دوه جی خلقی اوتورلردی «
 بلکه برزمان جیخوندن برقول آراه و برقول خزره
 دوکیلوردی ٦ بوجغا بن آمنک
 بوجغایه قدر خیره خانلرینک ذکره شایان واقعات
 خارجیه لری یوق در داخلا سلاطین پینلرند
 مقاتلات عظیمه کچدی مغلوب اولانلر خارایه
 قاچارلردی فقط بوجغانک قوتی هم حدود دولتری
 صار صماعه باشلادی حتی شاه طهماسب
 مقاومتدن عاجز قالوب دوام صلح ایچون عقد قرابت
 دیلدی بوجغایه هدیه لر تقدیم ایدوب کریمه سنی
 استدی خان کندی قیزی بولمادیغندن اغاسی
 سفیانک عایشه بک نام دخترینی شاهه تزویج ایلدی
 و مکمل جهاز دوزوب آغیش بن سفیان ایله
 ارسال ایتدی شاه بیوک آلایرله ممنونیت

اظہار ایلدیکندن بشقه قاینی آعیشک قالاسنی
رجاء ایدوب خنجدولایتی ویردی آعیش خنجدده
۳۰ ییل حکومت ایتدی

بوجغناک حکومتی شیکیه دن عبیدالله
بن محمود سلطان بن شاه بوداق بن ابوالخیر
بخارا حاکمک دخی کوزینی آچدی
۷ اوانش بن آمنک

اوانش وقتده آمنک اولادی سائر شهراده کانی
قهر ونفی ایدوب طاغ بویی صوب بویی هپ بونلره
قالدی اوحالده خوارزم حکومتی فی الجملة
اتحاد کسب ایدوب بیویه جکنی بخارادن عبیدالله
کوروب چکه مدی وزدینه التجاء ایدوب
باباسنک قانیچون اعانه طلب ایدن عمرغازییه
(بن سلطان غازی بن ایلبارص) امداد بهانه سیله
هپ ماورالنهر خانلرینی خوارزم اوزرینه قالدیردی
شویله که بخارادن عبیدالله تاشکندن براق خان

سمرقنددن جوانمرد خان حصاردن حزه
 ومهدی سلطان نیزه‌لری خلاصه بالجمله
 ابوالخیر اولادی عسکر چکوب خوارزمی فتح
 ایتدیلر عیدالله خان اوانشی عمرغازی‌یه
 تسلیم ایتدی عمرغازی آنی اولدردی فقط
 حکومتدن اثر کورمدی چونکه عیدالله خان
 خوارزمک اوزبک اوروقلرینی درته تقسیمله کندینه
 سمرقند خانه تاشکند خانه و حصار خانه
 توجیه ایلدی هربری کندی یرینه وکیلر
 و مأمورلر براقوب عودت ایتدیلر عیدالله
 خوارزم اوزرینه اوغلی عبدالعزیز خانی تعیین
 ایلدی

عیدالله فقه وادیاتده علامه ظهور ایدوب
 وقتنده علماء و حکماء رغبت بولدی عجم اوزرینه
 چوق محاربه‌ده قزاندی سلاطین عثمانیه‌نک
 بوکا کلنجیه‌دک آسیا اوزبک‌لریله برمخابره‌سی

معلوم دكل سلطان سلمان بو عبيدالله خان
 ايله بالخايله صفويه دينلان قزىلباش حكومتى
 رفع وازالاهيه اتفاق ايلدى فى ۹۴۶ عبيدالله
 خان وفاتنده شاه طهماسب او قدر ممنون ومتشكر
 اولدى كه هپ خانقاھلره وقزىلباش فقراسنه
 نذر صدقه لر احسانلر طاغدى عبيدالله
 يرينه پکن عبدالله خان بن كوچكنجى خان بن ابوالخير
 ايله دخى سلطان سلیمانك اتفاق دوام ايلديسه ده
 بونك براثرى كورلدى لكن فى ۹۴۸ پدري مقاضه
 بالاستقلال جلوس ايليان عبدالعزيز ايله تحاب
 واتفاق يالكز مودتنامه ارسالندن عبارت قالمايوب
 فى ۹۶۰ سلطان سليمان اوچ يوز نفر يكيچرى ايله
 بولوكوچك طويلر كوندردى فقط بويكيچريلر
 و طويلر وصولنده عبدالعزيز خان وفات ايتمش
 ويريني تاشكند حاكمى براق خان (نوروز احمد بهادر)
 غصب ايلشيدى براق خان سلطان سليمان

برسفير مخصوص ايله نامه كوندروب مألنده
 «تخت خلافته» جلوسنى اعلان ايدرو بومكتوبنده
 «وقتاكه سفرا كز واوچيوزيكچىرى بيولكوكوچك
 طويلر كتيرديلر» ديو اعانهك وصولنى ذكر ايدوب
 انجق كنديسى استقلالنى تأسيس ايچون
 محاربات ايله مشغول اولديغندن بالمقابله عجم اوزرينه
 اعانه ارسالنه وقت بوله مامش كى اعتذار ايلر
 سلطان سليمانك بومكتوبه يازديغى جوابنامه دن
 آكلاشيلور كه براق خانك كوندردىكى سفيرك اسمى
 «قوتلوق فولاد» ايمش سلطان سليمان سفيرك
 و نامهك وصولنى وعيدالله و عبدالعزيز ايله كچن
 تحابك دوامنى بعد الاشعار عجم ايله مصالحه
 اولنديغندن ايكي مملكت پيننده اعانه ارسالاتى
 ممكن اوله ميه جغنى اعلام ايدر

براق خان بخاراىي و خراسانى دخی ضبط
 يتدكن صكره اينكجى كره اوله رق نظام الدين

احمد چاوشی نامه ايله كوندردر بونامه سنك
مألى فتوحاتنى اعلان دن عبارت وتارنى
ربيع الاول ۹۶۳

اوچنجى نامه سى دخى ثابت در شيخ
مصلح الدين مصطفى (مولانا علاء الدين وعلى چلبى
ويحى چلبى اقرباسندن) اقرباسندن برينى زيارت
ايچون استانبوله كيدر كن براق خان توصيه
ويرمش در سلطان سليمان بومكتوبه ادرنه دن
۱ رجب ۹۶۴ جواب يازوب شيخه حرمت
ورعايت ده قصور ايدليه جكنى اشعارايدر

سلطان فردوس مكانك جادى الاولى
۹۶۳ تاريخلى بومكتوبى ده اوار اكادائر
مطالعه مزى اشاغى ده سويلرز

عبيدالله خان خوارزمى قتح ايلدكده اوانش
اوغلى محمود وعلى واولاد سفيان يوسف ويونس
واغاطاى اوغلى حاجم سلطان هپ طاغ بويى نه
۴

قاچوب درون ده دین محمد سلطان بن اوانش
 نزدینہ واردیلر واورادن خضرایی و آدقلی
 بهادرلریله بالمخابرة والاتفاق (عبیدخان عسکریلہ
 رجعت دن صکره) خوارزم اوزرینہ یوریدیلر
 هزاراسی وخیوہی آلدیلر اورکنجده عبدالعزیز
 خان بونی ایشیدنجه بخارایہ قاچدی

۸ قال خان بن آمنك

عبیدخان ایکنجی کره خوارزم اوزرینہ عسکر
 چکدیسہده مغلوبا رجعت ایشلش آمنك
 اولادی بالاتفاق حاجم خانی عبیدہ کوندروب
 صلح اواشلر و حاجم خان عسودت ایدرکن
 ماوراءالنهره التجاء ایشلش اولان آمنك اولادینی
 جمع ایدوب خوارزمہ کیرمش ایدی اولوقت بالاتفاق
 قال خانی نصب ایتدیلر قال خان داخلی وخارجی
 صلح و آسایشی تأسیس وابقاء ایدوب بتون همتی
 زراعت و عمارتہ صرف ایلدی ابو الغازی آنك

وقتی مدح ایدوب « برپولہ برنان بولدی » دیدی
 ۹ آغاطای بن آمنک

وزیرده اوتوردی وقتی اختلالات داخلہ ایلہ
 کچدی بخارایہ قاچان یونس بن سفیان اور کنبہ
 کلوب ضبط ایلدی آغاطای وزیردن عسکر چکوب
 اوزرینہ کلدی شیخ نجم الدین کبرانک مقامی
 اوکنده ایقاعا اولمان محاربہ دہ یونس غلبہ ایتدی
 واغاطایی اولدردی ولایات حکومتلرنده بولنان
 اغاطای اولادی بالاتفاق اور کنبہ یوریدیلر
 یونس مقاومت ایدہ میوب تکرار بخارایہ قاچدی
 واوغلی قاسم سلطانی بوانہزامدن صکرہ حاجم
 سلطان پدری قانیچون اولدردی

۱۰ دوست محمد بن بوجغا

بعده دوست محمدی خان نصب ایتدیلر
 درویش نهاد زاهد و عاجز برذات ایدی خیوہ دہ
 اوتوردی اور کنبہ آمنک اولادینہ قالدی

قزنداشی ایش محمد سلطان بن بوجفاکه ابوالغازی
 آنی فاسق وجسوردیو ذم ایدر ایکی کره اور کجه
 یوریوب اولاد آمنک ایله محاربہ لایندی
 اوچخی کره بغتہ کلوب اور کچی ضبط ایلدی
 سلاطین سائرہ هپ وزیره طویلاندیلر خراسان دن
 اوانش اوغلاری ونسادن علی سلطان بن اوانش
 کلوب وزیرده بونلره التحاق ایتدیلر اور کج ایله
 وزیر آره سنده محاربات ممتدا ولدی نهایت
 وزیر عسکری اور کچی صاروب درت آی محاصره دن
 صکره آلدیلر وایش سلطانی کندی نوکرلرندن
 بری برچکمشه مبنی انتقام ایچون اوردی
 دوست محمدی خیره دن کتیردوب اولدیردیلر
 حاجم سلطانی خان یاپدیلر علی سلطانه اور کچی
 کاتی و هزاراسی ویردیلر علی سلطان اور کجده
 قشلا یوب یازکلدکده قزیلباش علیهنه ترکانلره
 یاردن ایدردی استرآبادی و خراسانی قاچکره

آوردی فی ۹۶۵ بدرخان قومانداسیله
 استرآبادده اوزرینه کلان طهماسب اوردوسنی
 فناوزوب بتون قزیلباشلری قتل ایلش اولدیغی
 شرفنامهده مسطوردر فی ۹۷۶ فوت اولدی
 ۱۱ حاجم خان جلوسی فی ۹۶۹ اولوقت
 ۳۹ یاشنده ایدی حاجم حاجی محمددر اوزبکلر
 مرکب اسمی تحت ایدرلر مثلا ابوالمحمد خان
 (بن دین خان) ابوالخان ونورمحمد بن ابوالخانه
 نورم خان وخواجه محمدخانه خوجم دیرلر

دولت شیکه دن مشهور ومعروف عبدالله خان
 بن اسکندر خان بن جان بک سلطان بن خوجم خان
 بن ابوالخیر خان بونک وقتنده خوارزمی فتح ایلدی
 خانات شیکه دن سلاطین عثمانیه ایله قزیلباش
 علیه تدافعی و تجاوزی اتفاق ایدن برزاتده

ایشته بو عبدالله خان در اوزبکر بنده فتوحات
عظیمه ایله معروف در

فی ۹۸۴ عبدالله خان ماورای نهرک بعض
بلادنده استقلال کسب ایدوب فتوحاته باشلامش
اولدیغی شرفنامه دن اکلاشیلور حتی اوتاریخده
زاوه پی قتح و قزیلباشلره قتل عام ایلدی و تربتی
۲۰ کون محاصره ایتدیسه ده یاننده اولان
سلاطین اوزبکیه آره لرینه اختلاف دوشدیکندن
رجعتیه مجبور اولدی لکن اصل شانلی وقتی
۹۹۰ دن صکره در

فی ۹۹۳ عبدالله خان جیحونی کچوب
بدخشان دن بلخه قدر قتح ایلدی اورالده
۲۳۰ سال قدر حکومت ایتش اولان دولت
کورکانه پی محوایلدی

فی ۹۹۵ عثمانلی طرفندن فرهاد پاشا
قارمباغ بلادینی واوته طرفندن ده عبدالله خان

خراسانی استیلاء ایلدیلر

۹۹۶ عبدالله خان تکرار خراسانه
هجوم ایدوب قزلباشلره قتل عام ایلدی وینه
بویل اوغلی سلطان نصیرالدین عبدالؤمن
ایله برابر هراتی قتح ایتدی بووقعه دن صکره
عجم شاهی عثمانلی ایله اوزبک آره سنده قزلباشک
ازیلوب محاوله جغنی اکلادیغندن عثمانلیله
عقد مصالحه حیله سنی طوتدی بردها دائرة
دوستی دن چیقمايه جغنی عهد ایدرک و برادرزاده سی
حیدر میرزایی استانبوله رهن ویره رک بو طرف
غائله سندن قورتلوق استدی و فی ۹۹۸ بووجه له
نائل مرام اولدی

۹۹۷ عبدالؤمن مشهدی قتح و قزلباشلری
قتل ایلدی و مرکز حکومتی بلخ ده تأسیس ایتدی
فی ۹۹۸ عبدالله خان خراسان قزلباشلرینه
بردها قتل عام ایلدی لکن چه فائده که ایش

ایشدن یکدی بروطرف دن عثمانلی عجمه
عقد مصالحه ایلدی وعبدالله خاندن دخی
اورککه باشلادی

فی ۹۹۹ باقی خرسانی آلتی ایچون ماورای
نهر دن حرکت ایدوب آلتی ماه ظرفنده نیسابور
سبزوار اسفراین محولات تون
جناباد قاین طبس فره سیستان
وهزار شهرلرینی حیطة تصرفنه ادخال ایتدی
ظن ایدرزکه اکر سلطان مراد ثالث
عبدالله خان ایله عقدایتدیکی تجاوزی معاهده سنده
ثابت اولمش اولایدی یعنی فرهاد پاشانک
کوته بین پولیتقه سنه آلدانماییدی اشبو تاریخده
بتون قزلباشلری اورته دن قالدیرمق میسر ایدی
شووقتده شیعی بولمازدی و بوکون خیوه سنیلرینک
علیهنه کیدن روسیه دولتی عجم متفقنی بوله مازدی
عبدالله خانک سلطان مراد ثالثه ۹۹۵ تاریخلی

برمکتوبی وار بونک مالی کندی جلوسنی بعدالاشعار
قزیلباش اوزرینه حله ایچون وقت فرصت اولدیغنی
بیان ایدر بومکتوبی سفیر مخصوص ایله
کوندرمش

وفی ۹۹۷ برسفیردها کوندرمش سده
اولوقت عجمله مصالحه تقرر ایتکده و عبدالله
خانک ترقیسی چکیله مامکده بولنمش اولدیغندن
بوسفیر تانی اولکی قدر مظهرالتفات اولاماش

آرتق برمهم وقعه نیک بیانیه کلام عبدالله خان
۱۰۰۳ ۱۲ ربیع الاول تاریخی برمکتوب ایله
برسفیر دخی کوندروب هدایا تقدیم ایلش
هدایایی برمصحف شریف و برقطعه خسته
نظامی و بر شاهنامه و سمور و قاقم
کورکری بخارا مشینی

عبدالله خان بومکتوبنده حاج خانه غله
وخیوه اوزبکرینی تأدیب ایلدیکنی بیان ايله
عرض خدمت ایدیور

عجبا بو خدمت نه در

ماورای نهر خانی عبداللهک خیوه بی قحله
جزا ایلمسندن استانبول دولته نه فائده عايد اولمش
اشته بونی بیانه دأر بر مسئله بزم تاریخلرده
کوره مدم

فقط خیوه خانی ابوالغازی کابنده
بوکادأر بعض معلومات ویریور

ابوالغازی خان عبدالله خاتک خیوه یه کلیشنه برقاج
سبب بیان ایدر برنجی سببی شویله یازار

« سبب اولکیم عبدالله خان نینک اوازه سنی ایشتب
روم پادشاهی پیاله پاشا تینکانی ایلچی قلیب
یاریب تی من بو طرفدین بولاین عبدالله خان
اول طرفدین بولسین تی شیخ اوغلنی اوزیریدین

روتورالی تیب عبدالله خان پیاله پاشائی
 بخشی سیلاب قایداری کیلکاندا هندستان
 یولی برلان اوچ یلدا کیلتی پیاله پاشا ایتور
 موندین اور کنج باراین اندن ترکانه باروب کیمکا
 اولتوروب شراون بارسام اسطنبل بویولدین
 تورت آیلق یول تورور تیب اور کنج کیلدی
 حاجی محمد خانینک اوغلی محمد ابراهیم سلطان
 بارجه مالی آلدی روم غه یتکودیک خرجی بردی
 تقی منغشلاق غه ییاردی شروان کیمه سنه سالیب
 ییاردی عبدالله خان مونی ایشتب یمان اغریدی «
 بو حکایه دن آکلشیلدی که (۱) سلطان
 مراد ثالث عبدالله خانه ایلچی کوندروب سن
 او طرفدن بن بو طرفدن اورمل شیخ اوغلوئی
 (یعنی شیخ صفی اوغلی که مراد دولت صفویه در)
 اورطه دن قالدیرالم دیو معاهده یامیش
 (۲) عبدالله خانه مراد ثالث دن کلان ایلچی

پیاله پاشا ایش هند طریقہ اوچ پیل دہ
 واصل اولش (۳) بوالچی عبداللہ خان
 طرفدن عزت واحترام ایلہ قبول اولندقدن صکرہ
 عودتدہ ینہ برقچیل هندسفرینی اختیاردن ایسہ
 خوارزم دن ترکان ایچنہ کچوب بحر خزر ساحل
 شرقیسنده منغشلاق دن شروان سفینہ سنہ راکبا
 اوتہ طرفہ ممالک عثمانیہ یچکمنی اختیار ایش
 وبوطریقہ استانبولہ درت آیدہ واره جغنی حساب
 ایش (۴) اور کچہ وصولندہ محمد ابراہیم سلطان
 بن حاجم خان آنک بالجلہ مالی الندن آلوب فقط
 خرجراهنہ یتیشہ جک قدرشی براقہ رق منغشلاقہ
 ارسال و اورادن شروان کیسنہ ارکاب ایش
 (۱) عبداللہ خان متفق اولان عثمانلی سفیرینی
 خیوہ لیلر صوید قلریچون (ودہادیکر سیلرہ مینی)
 خوارزم اوزرینہ حرب آچش اولاد سلاطینہ
 جزاء ایش

آکلاشیلدی که مذکور ۱۰۰۳ تاریخلی نامه
شووقعه اوزرینه

عبدالله خان خوارزم اوزرینه اوچ کره کلدی
برنجی ده اهای مقاومت ایتدیلر یکی آریق دن
رجعت ایلدی ایکنجی ده فی ۱۰۰۱ اورکنج
اهالسی تسلیم اولدیلر

عبدالله خان خوارزمی استیلاء ایدوب اوتوزایکی نفر
شهرزاده کانی قتل ایلدی حاجم خان
اوغول لر یله و پولاد سلطان اولاد یله نیچه بیک
زجت چکهرک قاچه بیلدی عبدالله خان هپ
بلادی آلدی خراسان اوزرن دن یالکز درون
حاجم خان ده قالدی اولاد آمنک اوچ ییل
درونده اوتوردق دن صکره خوارزم اوزرینه کلوب
ضبط ایتدیلر عبدالله خان ایشددکه

او چنجی کره اوله رق کلوب استیلاء وضبط ایلدی
 یوندن صکره حاجم خان اولادی ونیره لری ايله
 عجمه شاه عباسه التجاء ایدوب عبدالله خانك وفاته
 قدر اوراده قالدی حاجم خانك او چنجی اوغلی
 سیونج قزیلباش ایچنده اوتورماغی اختیار ایتوب
 ایکی اوغلیله برابر دولت عثمانیه التجاء ایلدی
 فی ۱۰۰۷ خوارزمده غائله قالماینجه عودت ایتدی

مذکور عبدالله خانی شیایه اوزبکری
 کندی ذریتلرندن عدایدرلر خیه اوزبکری ایسه
 یادکار اولادن صایارلر دیرلر که شاه بخت
 بورکه بن یادکاری قتل ایتدیکی وقت برکه نك
 زوجیه سی قوجاش میرزائک قیزی بورکه دن
 ایکی آیلق که ایدی شاه بختک عوجه سی
 خوجم سلطان بن ابوالخیر خان انکله تزوج ایتدی

یدی ماه صکره براوغلان طوغدی آذینی جان بک
 قودی آنک اوغلی اسکندر خان و آنک اوغلی مذکور
 عبدالله خان در بوصورتله عبدالله خانک جدی
 بورکه نیک اوغلی در ابوالغازی دیرکه ۱۱ بزینک
 آق سقالاریمز ایتورلار ایردیلار عبدالله خان
 اولوغ اتاسی برکه نیک قاینی ۱۲ وینه دیرلرکه عبدالله
 خان خوارزم سلطانلرندن مروه حاکمی دین محمد بن
 اوانشک کریمه سنی آلدی اوغلی عبدالمؤمن
 خان بوقیزدن کلدی ابوالغازی به کوره
 عبدالله خان فی ۱۰۰۶ فوت اولدی عبدالمؤمن دخی
 آردی صره قتل اولندی عبدالله خان نسلی
 عبدالمؤمن قتلیله منقطع اولدی بوندن صکره
 بخارا باتوخان نسلندن اژدرخان اولادینه نوشدی
 وفی ۱۲۰۱ تکرار اوزبکله کچدی

حاجم خان فی ۱۰۰۶ عبدالله خان وفاتندن صکره
 کلوب خوارزمده اوتوردی نورم خان بن ابوالخان

بن‌دین محمدخان دخی مقدا کندی الیه عبدالله
خانه ویرمش اولدیغی مرویهی کتدی تکرار
ضبط ایتدی حاجم‌خان فی ۱۰۱۱ فوت اولدی

خاطره

سلطان سلیمانک اوزبکله ۹۶۳ "تاریخلی
یرمکتوبی دهاواردیو یوقاروده بر اشرت ایتشیدک
(صحیفه ۷۲) بورساله‌نک باشنده مرسل الیه‌ک
اسمی « وزیر حاجم‌خان بن اغا طای » در
صورت مکتوب فریدون منشآتک ذیلنده
۴۹ نومرولی مقید اشته بونامه‌ی مورخلر شیکه‌دن
براق‌خان وزیرى حاجم‌خان بن اغا طایه ظن ایدیورلر
بزه‌قالورسه مرسل الیه حاجم‌خان بن اغا طای
شود کرا ایتدی کمز خیوه‌خانی حاجم‌خان بن اغا طای در
بوکا کوره سلطان سلیمانک خیوه‌لرله معارفه‌سی

و مخابره سی ثابت اولور مکتوبک تاریخی
 ۹۶۳ اولماسی ظمنه طوقتماز زیرا حاجم اولوقت
 اوتوزاوج اوتوزدرت یاشنده اولوب خراسانده
 باغ آباد حاکمی ایدی
 «وزیردن» مراد بلکه خوارزمده وزیر شهری در
 یدمده نامه نك صورتی بولمادیغندن دهازیاده
 تفصیل ایده مم

۱۲ عرب محمد خان بن حاجم خان جلوسی
 فی ۱۰۱۱ زواللی نك اون طقوزیل خانلغی
 خانلق دعواسیله ماورای نهر دن هجوم ایدن
 خسروسلطان (ایلبارص ذریتندن) و صکره
 صالح سلطان (حسن قوی بن ابوبک اولادندن)
 غائله لر یله وروس و قالموق استیلارینه قارشو
 محاربات ایله کچدی عاقبت اون عوللرندن

جیش وایلبارص قیام ایدوب عوغاده عرب محمدی
 طوتدیلر ابتدا کوزلرینی اویوب حبسیله اکتفاء
 ایتدیلر شده مؤخرا اوج قاریسی وایکی کوچک
 چوجقلریله برابر فی ۱۰۳۰ اولدیردیلر بونلرک
 قرنداشلری اسفندیار خان عجمه شاه عباسه
 قاجدی و ابوالغازی و شریف محمد خانلر
 بخارایه قاجدیلر ایکی ییل اختلال داخلی
 ۱۳ اسفندیار خان بن عرب محمد خان جلوسی ۱۰۳۲
 اسفندیار خان شاه عباس دن ۳۰۰ عسکر
 و تکه و سایر ترکانلرندن ویموت دن براز خلق آلوب
 قرنداشلرندن باباسنک قاتی آلغه یوریدی و غلبه
 ایدوب جیشی وایلبارصی اولدردی بونک وقتنده
 خانات ترکستان ده ایشم خان و طاشکندده
 طورسون خان و بخاراده امام قولی خان ایدی
 ۱۴ ابوالغازی بهادر خان بن عرب محمد خان
 اوشال کابنک صاحبی ابوالغازی که کندی

ترجمہ حالی تفصیلاً یازمش و ناقص براقدیغی پردن
 اوغلو امال ایلش در کندی بیانہ کورہ
 دنیاہ کلہ جکی تاریخہ پدری عرب محمد خان
 اور کنجی باصان روسیہ لولرہ حرب ایدوب غازی
 اولدیغندن طوغدیغی کی ابوالغازی تسمیہ ایتش
 بویانندن آکلاشیلان ابن الغازی اولہ جوق
 فقط کتابک مطبوع نسخہ سندہ ابوالغازی باصلش
 و اویلہ دہ شہرت بولش بزده اویلہ یازدیق فی ۱۵
 ربیع الاول ۱۰۱۴ دنیاہ کلش وقی ۱۰۵۴ قرن داشی
 اسفندیاروفاتیلہ یرینہ خان اولش فقط خانلغی آرال
 کارینی کچمدی اوزبک طرفنی طتوب ترکمانلرک
 علیہندہ بولندیغندن مالکانہ لری و بتون خوارزم
 حاصلاتی ترکان بکری ضبط ایتدیلر و خطبہ بی
 بنارا خانی نذیر محمدخان نامنہ اوقیوب اشرف
 سلطانی (ابن اسفندیارخان بن عرب محمدخان)
 خان طانیدیلر لکن برازوقت صکرہ نذیرخان

قاسم سلطان بن خسرو سلطانی خیمه اجلاس
ایتدی و مؤخر آئی یانه آدیروب یعقوب نام
برامیری چوق خلق ایله خوارزمه والی تعیین ایتدی
القصة نذیر محمد خان طور دجه ابوالغازی
هرنه قدر فداکارانه محاربه لر ایتدیسده خیمه
مالك اوله مادی

فی ۱۰۵۶ بخارا امراسی نذیرخانی عزل ایله
یرینه بیوک اوغلی عبدالعزیزخانی نصب ایتدکلرنده
خیمه والیسی اعانه سز قالوب ابوالغازییه مقاومت
ایدهمدی قاجدی اشته او تارینده ابوالغازینک
خیمه خانلغی تقرر ایتدی بوتارینه قدر بخارا
خانلرندن اوچ خان (عبید و عبدالله و نذیر محمد)
خیمه بی فتح و برازمدت اداره ایتدیلر

بوندن صکره خیمه خانلری بخارایه غلبه
کوستردیلر ابوالغازی داخلی و اطرافنی
احاطه ایدن ترکمانلری و قالموقلری تحت اطاعته

آل دقن صکره بخارا اوزرینه هجوملره باشلادی
 بدأ هجومه سبحان قولى سبب اولدی شويله که
 بخارا خانى عبدالعزیز ثانی کنیدی قرنداشی
 بلخ خانى سبحان قولى نك مملکتی قصد ایلدکه
 سبحان قولى ابوالغازی دن استمداد ایلدی
 سبحان قولى ابوالغازینک قرنداشی شریف
 محمد خانک قیزی طوتدیغندن پینلرنده قرابت
 وعلاقه وارایدی ابوالغازی امداد بهانه سیله
 مقدا خوارزمده قان دوکن بخارالیلردن انتقام
 قصدايدوب آتلاندى بخارا اطرافنی چارپوب
 خيوهيه عودت ایتدی ایرتسی سنه
 ینه کیدوب عبدالعزیزک مقاومت ایدن اردوسنی
 بوزدی وقاره کول قلعه سنی قح واهالیسنی
 اسیر ایلوب عودت ایتدی ده ا ایرتسی یل
 چارجوی ده ا ایرتسی یایچی یی اوردی
 سال آتی کرمینہ یی باصدیغنده عبدالعزیز خانک

۶۰۰۰۰ نفر دن مرکب اردوسنی منہزم قیلدی
ابوالغازی ۲۳ ییل خانلق ایدوب فی ۱۰۷۴
فوت اولدی

۱۵ انوشه بهادرخان بن ابوالغازی خان
بدری حیاتنده مقامنه اجلاس ایتدی

۱۶ محمد بهادر آرانغ خان بن انوشه فی ۱۰۰۶
محمد بهادرخان دولت عثمانیه ایله مستقیماً مخبره
تأسیس ایتدی و روسیه ایله اختلاط و تجارت
عقد ایلدی صدراعظم مصطفی پاشا طرفندن
مشارالیه یازیلان مکتوبك صورتی راحی انشاسنده
مقیددر داماد ابراهیم پاشانك صدارتنده

فی ۱۱۳۳ استانبوله ایکی سفیری کلدی
فی ۱۱۲۶ روسیه دولته برایلچی کوندروب
عقد مودت ایلدی لکن ایکی اوچ سنه کچدی
کچمدی روس عسکری بکویج ایله خیوه طپراغنه
ایلاق باصدی ایرتسی ۱۱۳۰ تکرار مر قوم

بکویح که صحیح اسمی دولترای در ۳۰۰۰ مسکو
عسکر یله کلدی شدتلی محاربه لردن صکره کندی
و بالجمله عسکری هلاک اولدی

دلی پترو خیه اوزرینه بو عسکری نیچون کوندردی
روسیه لی مورخلر یازیورلر که جیچون
قوملرنده توز آلتون بولنورمش طویلاتغه
کوندرمش نه تحف و کولنه جک شی

بعضیلری ده یازیورلر که جیچون چایی
بحر خزره آقارکن خیه لیلر سد چکوب چایک
یتاغنی آرال کولنه دوندرمش لر روسیه دولتی
بو عسکری اشته اوسدلی سوکدیرویده نه ری
اسکی آقندیسنه چویرمک ایچون کوندرمش
فی الواقع خیه خانی ابوالغازی جیچونک بحر خزره
آقارکن فی ۹۸۴ آراهه دوندیکنی ذکر ایدیور
وبعض عالم سیاحلر نهرک بحر خزره اسکی بحراسنی
بولدیلر

لکن قنغی عقل کسرکه او یله دریاکبی برچایی
 خیوه لیلر بحر اسندن دوندیره بیلسونلر
 شو یاز دقلری سبیلر هپ اکاذیب موهومه در
 دلی پتروتک عسکر کوندیشی خیوه یی عادتتا استیلاء
 ایتک ایچون ایدی

کله لم دولتکرایک کیفیت هلاکنه
 مور او یف کی جنرالر بو عصرده یازی سورلر که
 خیوه لیلر آنی دیری دیری یوز مشلرده در یسنی
 طبله کر مشلر

بز بوروایتی تکلبک باشنده بلا اعتراض تسلیم
 ایدی ویره رک جواب ویردک لکن برکرده اصلی
 آره یه لم باقه لم صحیح می

طالبایس هرودوط اوزرینه حاشیه سننده
 بکویح قصه سنی نقل ایدیور فقط اولدیر دیلر
 دیور یوزمکه کرمکه دائر هیچ بر اشارت یوق .
 بوندن بشقه المانیالورک ابوالغازی ترجمه سننده

(لیدده مطبوع فی ۱۷۲۶ میلادی) دخی بوقصه
 علی التفصیل یازلش بکویچی وعسکرینی ترکانلر
 اولدردی دیوراشته اوقدر . اگریوزمک
 وقعہسی صحیح اولایدی کیفیتی وقوعنه قریب
 سنه لرده یازانلره خفی می قالوردی

جیحونک آرال کولنه آقدیغنی بوندن طقسوز
 اوز عصر اقدم بیان ایدن مسعودی ایله فی ۹۸۴
 آراه دوندیکنی یازان خیوه خاننک قوللرینی
 تطبیق بحشه کلنجسه بوخیوه تکابی اوزرینه
 برخریطه یامق نیشده اولدیغمدن آنده نهایت
 آکلایه بیلدیکمی کوستریرم

۱۷ احمدبک خان

۱۸ محمدامین بن احمدبک

۱۹ عوض بن محمدامین

بونلرک وقتلرنده اختلالات داخلیدن بشقه
 برشی یوق

۲۰ التجرب بن عوض

مدت حکومتی برسنه فقط شو برسنه ده اختلالات
داخلیه پی باصدیردی اوزبک شعب مختلفه سنی
جبرا وقهرا اتحاد ایتدیروب خان مطلق اولدی
و بخارا اوزرینه عسکر چکدی جیحونی
چکرکن بوغولدی بوندن صکره برازنه اختلال
سوردی

۲۱ محمد رحیم بن عوض

فی ۱۲۱۷ جلوس ایتدی قیرغیزلری و یرکویه
باغلادی قیرغیز خانلری بونک طرفدن نصب
اولنور اولدیلر

رحیم خانه کلنجیه دک خیره حکومتده بعض
تبدلات اولمش لکن تفصیلنه واقف دکلم شوقدرکه
یکن اختلالات داخلیه آره سنده مغلوب اولان
رؤساء جیحون و آراش شرقیسنده ساکن قاره قالیاق
سلطانلرندن استمداد ایدرلر دیینه بروقهده

امداد نامیه کلان سلاطین قیرغیزدن نورعلی
 ۱۱۵۳ سنه سی خیوه خانلغی ضبط ایدر او تور
 بو قیرغیزلر شو تار یخدن سکر طقوز سال اقدم
 روسیه اداره سنه یکمیش اولد قلرندن مرقوم
 نورعلی خیوه خانلغی ضبط ایدنجه روسیه دولته
 تبعیتی بالتاً کید عرض ایلر و خیوه حکومتی
 روسیه یه تابع برامارت هیئته قومی استر برمدت
 صکره مرقومی قاره قالیقلر کندیلرینه سلطان
 انتخاب ایتد کلرندن اسکی محله عودت ایدر
 تحفشی الیوم قیرغیز سلطانی منکوبین
 بیرعلی روسیه چارینه بر نامه یازوب کندیزی
 نورعلی اولادندن اولدیغنه مبنی خیوه خانلغی
 استدعاء ایلدی وبر کره خان یاییلورسه انکلیری
 هنددن قوغه جغنی وعد ایتدی
 تحفلقدن بری ده شوکه مسقوه غزته سی بو کونارده
 خیوه اوزرینه یازدیغی بر بنده شویله دیور

« روسیه خیوه یی قشایتمک استیوردیو طعن ایدیورلر

حالبوکه خیوه آیروجه بردولت دکل در

۱۷۴۰ میلادی قیرغیز رئیس خیوه خانی اولدقده

خیوه یی روسیه دن برامارت یاپدی »

محمد رحیم خان غنجه مذکور قیرغیز سلطانلری

خیوه حایه سنه کیردی لر مزبور غنجه بوراسنی

هیچ سویلیور فی ۱۲۳۶ خراسان کردلری

ایلچی کوندروب حایه سنی طلب ایتدی لر

محمد رحیم سلطان محمود ایله نامه لشدی فی ۱۲۳۵

سلطان محمود خیوه خانه برطوبی اوستایله برمنجه

کوندردی بو طوبی کلنجه یه قدر محمد رحیم

تاسیس ایتدی کی طوبی خانه مسقورک دو کدکلی

طویلر هر نصلسه بردرلو طیانمازدی تجربه ایچون

آتیلورکن طاغیلوردی استانبوللی طوبی

اوستا دیدرکه خیوه طوبی خانه سنی یولنه قودی

طویلر دو کدی اوستا دلر یتشدیردی منجم افندی

هیئتدن خیلی شی بیلوردی خسوف و کسوف
حسابنی خیوه ده برنجی کره تعلیم ایدن اوزات ایدی
حالی اوزبک طلبه لرینک برتخته اوستشده
مخطوط طقوز حسابیله خسوف و کسوف بولالری
آنک آتارندن در

نظام جدید در خیوه

محمد رحیم روسیه ده دلی پترونک و مؤخر
استانبول ده سلطان محمودک عمل ایتدیکی
«لاخیر فی کثره الرؤساء» قاعده سنحه اعیان متغلبه یی
بتون قیروب هر شهره کندی استقلالنی تصدیق
ایتدیردی بعده حاکمیت و محکومیت قاعده سنی
لغو ایتدی یعنی فاتحانندن اوزبکر خدمت حکومتی
حصرا اللرینه آکشر دیگر قوملر خدمته حصه دار
اوله مازلردی بوقاعده یی ابطال ایتدی و بولغوی

بالفعل اجراء ایچون بروزیرینی سارتدن
دیگیرینی اوزبکدن اوچنجی وزیر عجمدن
وسر عسکرینی ترکاندن و مابینجینی مسلمان
اولش برمسقودن (اسمی تگری قولی قونش ایدی)
نصب ایلدی

خیوهی مرکز حکومت آتخاذایدوب مجلس احکام
تشکیل ایتدی بو مجلس هرچعه عقد اولنور
مجلسده موظف اعضا مهتر اغا برنجی وزیر
(خان بولنمادیغی وقت قائم مقامق ایدر)
قوش بکی ایکنجی وزیر محرم اوچنجی
برده درد بچی وزیر بووزرانک کتبه سی دیوان بکی
تسمیه اولنور معیت مأمورلرینک عنوانی میزا
خانک اقرباسی مثلاً قدداشلی مجلسده اعضا دندرلر
قاضی و قبائل اربعه منتخبلری درت ذات دخی
اعضای موظفه دن

اعضای موقتہ خانک تسمیه و نصب

ایده جکی مقر بلدر که بر عددده محصور دکل
 بو مجلسک اسمی ❖ کورینش خانه ❖
 خیودن بشقه شهر لرده قصبه لرده مدیر لک
 ❖ آتالق ❖ یدنده در

قوه اجرائیه خانک النده اولوب معینده اجراء
 مأموری وارد در ❖ یساقچی باشی ❖ تسمیه اولنور
 ضبطیه ❖ یساوول ❖ دیرلر یساوول سلاح
 طاشیماز النده اوجی باقر قایلو دکنک وارد در
 هر شهر هر قصبه هر قبیله کندی حریت
 واختیار یله بروکیل تعیین ایدر که ❖ آق صقال ❖
 دیرلر تکالیفی اشخاصک قدرتنه کوره توزیع
 وجع ایدن و اوامر حکومتی تبلیغ ایلان آق صقال لردر
 ضربخانه و باروخانه و طوبخانه تأسیس ایتدی
 موظف عسکر تشکیل ایلدی

محمد رحیم خان روسیه ایل و بخارا ایل و تجارقی
 توسیع ایلدی و خیوه ده اصلاحات منویه سنی

اجرادن ضکره کویا استراباد اوزرندن عجمستانی
 اورمق نامیله اوتوزبیک عسکر واوتوز طوپ
 قالدیروب بحرخرر سواحله دوشدی اورالرده
 یول کسان ترکمانلری اوردی خیوه ایله بحرخرر
 اره سنده کندینه مخالفت ایده جک کیمسه برامادی
 هپسنى خیوه اتفاقنه آلدی جیحون جهت شرقیه سنده
 قاره قالمیقلره دخی بویله یاپدی روسیه دن
 ایلیچی قبول ایتدی وکندی دخی ایلیچیلر کوندردی
 لکن بالاخره روسیه چاری بحرخررک جهت
 شرقیه سنده روس اسکان ایتکه مساعده طلب
 ایلدکده ردایله جواب ویردی و طیاتدی
 یوزده فقط ایکی ییقى کرک وضع ایلدی
 افغان ایله یوک دوستلق ایتدی

۲۲ رحن قولى خان ابن محمد رحيم خان غایت
 شجاع و مدبر ظهور ایتدی بونک و قتده خیوه
 یسودی روسیه نك سوق ایتدیکی اون ایکی ییک

عسکر بوزلدى قيرلدى

۲۳ محمد امين خان بونك عليهنه عجم روسيه ايله
اتفاق ايتدى روسيه دولته درت دفعه سفيرلر
كوندروب صلح واسايش ده دوام اولماسنى رجاء
ايلديسه ده روسيه نك حرص استيلاسنه اصلا تاثير
ايتدى عاقبت ۱۲۶۹ آخرنده روسيه اعلان حرب
ايدوب فى صفر ۱۲۷۰ عسكى خيويه كلدى
وجبرا معاهده مضره امضالاتدى ۱۲۷۲ عجم
خيويه عليهنه محاربه ده اصرار ايله دوام
ايتدى خانى كريات نام محله كندى تركانلرندن
برى خيانت ايدوب خنجرله اوردى كله سنى
حاليا شاه ناصر الدينه اسكى اصول اوزره
تقديم ايتديلر عجم شعرا سندن سروش بى هوش
ويله برغزاليله جوش وخروش ايتدى اورتالغه
شاه اسماعيل دورينك طورىنى ويرمك استديكندن مى در
نه در شوكله فتوحاته برقصيده ياپوب تقديم

ایلدی مطالعی شودر

مطلع

افسیر خوارزمشه که سودبایوان

باسرش آمد درین مبارک ایوان

۲۴ محمد فیض خان

الیوم خان در قیمت وخصالتی باقلم شمدی روسیه


استیلاسنه قارشو کوریه جک

دیمک که بوکونه دک خیهوده کلان ایلبارصیه

خانلری ۲۴ نفر در بخارا حاکم نندن خیهویه

حکومت ایدن عبید و عبدالله و نذیر ایله

جعا ۲۷ نفر



سکه و زراعت
و صنعت و تجارت
و مالیه

« سکه » ضرب خانه تشکیل ایدن محمد رحیم
خان در بوندن اول خیره سکه سی اولدیغنی بیلورز
کر کنج کبری خرابه سنده بولمیش خیلی سکه لر کورلدی
ایچلرنده هیچ اوزبک سکه سی یوق
اڤ قیمتلی سکه طلا دیدکلی آلتون
۱۶ فرانق قیمتده در بزم آلتون رسمده مدور
اولوب کوزل ضرب اولمیش در برطرفنده
محمد رحیم یازیلو دیگر یوزنده سنده سی و محل
ضربی و نعامحرر بو خطک اطرافنی نقطه لرله
برداثره اولوب قیمت سکه یه دائر رقم وار
ر طلا ۱۴ عباسی یه منقسم در هر عباسی

برفراق ۱۴ سانیتم قیمتده عباسی خیهو سکه سی
اولمایوب حساب پاره سی در

بر طلا خیهو سکه سیله ۱۸ تنکه در
طلا آتون وتنکه کوش عیارلری خالص در
خیومك برتنکه سی بزم ایکی لك کوش مجیدیه
رسمنده فقط ده قالدین هرتنکه ۴۰ قاره پوله
منقسم قاره پول باقر بزم باقر پاره قدر فقط
او قدر قالدین که وزن جه قیمتی فرانسزك برصوینه
مساوی

اجانب سکه لرندن خیهوده ایشلیان
بخاراك پادشاه طلاسی در خیهو آتونندن
وزنده و قیمتده کوچك

فلنك دوقه سی دخی چکر اگر قیر پیلامشسه
۱۰ عباسی یعنی ۲۰ تنکه

عجم کوشی دخی چکر بش. بچق عجم ریالی
برفلنك دوقاسی دکر

لکن کیرن اجانب سکه لری همان ضربخانه یه
طویلانوب خیوه سکه سنه تحویل ایدیلور
خیوه لیلر یهودی صراف کی پاره دن ایوا کلارلر
چابق حساب ایلرلر وزیوفی نقدایدرلر

خیوه او یله معمور که هیچ آثار خرابه کورغز
قریه لر چفتلکلر و قصرلر بربرینه یقین اولوب
خالی یر یوق در اقلیمک و جیحون قناللرینک
اعانه لریله حاصلات ارضیه او یله بذل و برکت
اوزره در که اوروپا ارضنده احتیاج مس ایدن
ماکنه لره اوراده حاجت کورلر

حبوباتدن چوق زرع اولنان بغدادی چاودار
سیسام سیسام یاغی چوق صرف اولنور همان
عموما بو یاغدن یا قارلر آریه و کنویر ایوا اولماز
آتلی چوغان ایله بسلرلر کوک بو یا زراعت
و تجارتی مهم در باغلی و عیش باغچه لری
چوق مکمل اناطولی ده کشنش دینلان

قوری اوزم دن چوق اخراج ایدرلر بوندن بشقه
 صاحبی دیرلر چکردکسز برقه-وری اوزم
 دهاچیقارلر معتبردر الما وارمودک انواعی اولور
 بادم کراز ویشنه نار و دیگر بزده اولان میوه
 اغاجلری چوق یاقه حق اودون چوق الک چوق
 اغاج توت اییک بوجکی ایچون بوندن صکره
 کثیر اولان اشجار سالقم سکود اعلا برغوت اولور
 بیلدیگمز هپ سبزوات وار یالکز لحنا یرالماسی
 شلغم یوق صوغان پک بیوک اولور الی الیوم
 خیوه قارپوزی تعالی نیک وقزوینی نیک مدح ایتدیکی
 کی در خیوه قارپوزینک جهانده متلی بولنماز
 مأمون خلیفه یه و صکره و اتقه اورادن قارپوز
 کوندریلوردی عباسیه وقتنده خیوه قارپوزینی
 قلایدن ظرف ایچینده قارایله محاط بغداده
 کوندرلردی صاغلام واران قارپوز کبار
 سفره لرینه قونق ایچون ۷۰۰ درهم دکردی

دوه اينك قيون سوريلری چوق در
هر شخصك برآتی وارد زكنيلرك متعدد

صنایع جه کنديلرينه لازم شيلر ايچون
دستگاهلری فابريقه لری وار یرلی و بخارادن
اخراج ايتدکلری ايلك دن و پاموق دن قاشلر
زلرطوقورلر خيوه قادينلری خياطت و قطريز
واوياکی ايکنه ايشلرنده يك ماهرلر دوه تویندن
کينك ويورغان و صوف دن احرام ياپارلر
يايدقلری قوشاق وکريک کوزل ويک اعلا در
فن ابنیه ده خيوه ليلر بتون آسیاده مشهورلر
فقط جيچون کارلری ايکی آرشون فازلدقه
صوچيقديغندن و بوجهتله طاش بنایه تحمل
ايتديکندن ابنیه يي سکوداغاچندن انشاء ايدرلر
تيمورچی اوجاقلری فقط داخله کافی در ميشينه

اعمالی بیلزلر خیوه ده اجانبك شیشه تجارتی نافع در
 دكرمنلری آتایله دوه ایله دوندردرلر خیوه ده
 چوق صابون کارخانه لری وارددر خیوه صابونی
 نفاسی و او جوزاغی ایله بتون آسیاده مقبول در
 کلبتلو صابون اخراج اولنور

تجارت داخلیه بازار یئرلرنده و پنا یئرلرده اولور
 هر شهرده اسبوعی ایکی بازار طورر خیوه
 بازارلری بازار ایتسی وجهه کونلری در بونلردن
 بشقه قنالر کارلرنده دکانلی پنا یئرلر وارددر اطراف
 ترکانلری وقاره قالمق لری لوازمی خیوه دن
 تدارك ایدرلر

تجارت خارجیه جه معاملات بخارا و روسیه
 ایله در خیوه دن بخارا دوه کاروانسه یدی
 ككونلك در خیوه تجاری بخارا دن یری

واجبی مالی جانفس باصمه تیره ابریشیم
 قطیفه شال چینی جای و مشین آلورل
 اموال تجارتک بورسہ سی کر کج شهری در
 اورادن روسیہ دہ عورانبورغہ واستراقانہ
 اخراج ایدرلر خیوہ تجارتک روسیہ یہ
 یولی اوچ بری قیرغیز چوللریلہ عورانبورغہ
 ۳۳ کون سورر ایکنجی یول بحر خزر دہ
 منغشلاقہ ۲۹ کونلک اوچنجی یول
 بحر خزر دہ بلقان یولی بوسفر ۱۷ کونلک در
 شوایکی ساحلدن سفائلہ استراقانہ کیدرلر
 خیوہ تجارتی طریقک اوزون وقیصہ اولدیغہ
 باقاییوب آتجق کچہ جکاری برلزدہ کی ترکمانلرک
 امنیت و سلامت ویرہ جکلرینہ ویرمہ جکلرینہ
 نظرایدرلر شمالی منغشلاق ترکمانلری خیوہ لیلرلہ دائماً
 مصالحہ و مسالت اوزرہ اولدقلرندن اکثریا بو طریق
 ترجیح اوانور روسیہ کیلری وقت معین دہ

و ساحله کلوب ترکانلر واسطه سیله وصولرینی
اعلان ایدرلر خیوه تجاری کلوب برچوق
اموالی اوراده مبادله ایدرلر باقیسینی سفائنه
تحمیل استراقانه چیقارلر

خیوه دن سنوی کاروانلرله اخراج اولنان
اموال تجارت ۲۰۰۰ دوهلک در روسیه دن
خیویه ادخالات اون اون ایکی صندوق اولور
فقط بو صندوقلر بیوک انبار کی در

خیوه تجاری روسیه یه کتیردکلری اموالک
برازینی پاره ایله ساتارلر و چوغنی انکلیر
چوخه سی قطیفه صرمه قلابدان
شکر ایکنه اوسطوره پیچاق دلبند
آینه کاعد باقر قورشون قاپ چناق
شیشه کی شیلرله مبادله ایدوب بونلری خیویه
و بخارایه ادخال ایدرلر

بعض تجار استراقانده ایشنی کوردکن مسکرمه

اورادن نوغوروده (قازان ايله مسقو آره سنده)
 تموز پنايرينه و بعضی مسقو پنايرينه کيدر
 کیمی نوغوروددن عورنورعه مال نقل ايدر
 بخاراده و روسیه ده مغازه آچش مقیم خیوه
 تجاری واردر استراقان ده نوغای قیزيله
 تاهل ایتش وارمی تجارت ايله اورتاق اولوب
 کیلان و استراباده مال دوکش خیلی تجارت وار
 بونلر استراقان ده اون بش یکر می سنه اقامت ایدوب
 زنکین اولدقدن صکره (بزم علائیه لیلر کی)
 وطنلرینه عودت ایدرلر

استراقان ده ارمنی تجارتینک خیوه لیلره حیله
 و خیانت ایده کلدکلری مشهوردر
 مسقولر بطل حریفلر اولوب خیوه تجارتنه
 کمترلر بعضا تجارت ناميله کیدن روسیه لیلر
 تجارت اولمایوب جاسوس در بوجاسوسلرک
 خیوه ده کتم اسرار ایتلری محال قیلندن در

چونکه خيوه ده مسلمان اولش و خان خدمته
کيرمش چوق مسقوبولنوب بولر روسلرک لسان
و حيله لرینی يلدکلرندن جابق فاش ايدرلر
فويه لرینی ميدانه چيقاررلر

شیعی ایله سنی پندنده يك مباينت بولنديغندن
عجملرک تجارت ایچون خيوه یه کتدکلی یوق در
خیوه نك مستقل ترکمانلر ومستقل قاره قالپاقلر
وقیرغیز قایساق ایله کینک قالی کلیم سجاده و آت
تجارتلری مهم در

قیرغیز قایساقلرک آت پنایری یکی «کات»
شهرنده در بوقیرغیز آتلی صغوغه صوسزلغه
بورغونلغه جرجان آتلی کی چوق تحمل ايدرلر
بوقیرغیزلر در که روسلری اسیرایدوب کتبر
خیوه ده صاتارلر

- «مالیه» اوراده مالیه یوق در زده
 اسکی دن اولدیغی کبی مهریه اصولی در
 خزینہ خان وارداتی شو نلردن مرکب
 ۱ مطبخ ویرکوسی یعنی خانه ویرکوسی
 ۲ کرک
 ۳ زکات
 ۴ کاروان رسمی
 ۵ مال غنیمت خسی
 ۶ خانک چفتلکات و اورمانلرینک وارداتی
 ۷ هر صنفدن خانه کلان هدایا
 ۸ عوارض
 عسکرلکه کیدن اوزبکر و ترکمانلر ودخی عمله
 و خدمتکاران و بالجمله مطبخ صاحبی اولیان یعنی
 باشلو باشنده خانه صاحبی اولیانلر برنجی قلم

ویرکودن معافلر بو مطبخ ویرکوسنی خلقک
انتخاب ایتدیکی اختیار مجلسلری تقسیم ایدرلر
بناء علیه الٰزنکین اولان الٰچوق ویرر خیوه ده
زنکینه الٰبیوک ویرکو ۵۰ فرانق قدر
الٰشاعیسی ۱۲ فرانق طوتار

بو ویرکو سارتلرایله قاره قالپاقلره دوشر
مطبخ ویرکوسی ویرن بالجه سارت وقاره قالپاقلری
اشاغی دن اشاغی ۱۰۰ بیك فرض ایدوب
بربر اوزرینه ۲۵ فرانق حساب ایلسهك بوقلم
۲ ملیون ۵۰۰ بیك فرانق ایدر كرك بیوك ایراددر
بالجه وارداتك نصفی در بش ملیون فرانق قدر طوتیور
زكات تركمانلرك یالكر قیون اوله رق سفیان
خانه ویردكلری زكاتدن معلومز اولان شوو جهله در
قیون وقوزی

۸۰۰۰	تکه سارق ویموت تركمانلری
۱۶۰۰۰	ارساری

خراسان سالوری	۱۶ ۰۰۰
حسن ایللی	۳ ۶۰۰
ایلدور وچاودور	۱۰ ۰۰۰
اوشاق ایللی	۴ ۰۰۰
آراچی	۴ ۴۰۰
کوکلان	۱۳ ۲۰۰
اداقلی	۱۳ ۲۰۰
	<hr/>
	۸۸ ۴۰۰

بونلردن یشقه چاقرلی و جیحون کارنده اوج ایل
 و تیوه جی (دیوه جی که التی بیک خیمه دن زیاده در)
 دخی زکات ویرلردی فقط مقدارینی بیلیورز
 شو ۸۸ بیک اوزرینه هپسنی یوزبیک حساب
 ایتسه ک اورانک رایجیله برملیون فرانق قدر طوتار
 دردچی قلم کاروان رسمی که شهره کین
 هرکاروان بایع اولسون مشتری اولسون کراجی
 اولسون دوه باشنه یارم طلا رسم ویرر سنوی

الكاشغى ۵۰ بيك دوه داخل اولايور ۴۰۰ بيت
فرانق ايندر

خانك چقلكتى واورمانلى كه اجدادن قلان
ومصادرمايدىلان املاكدر بوچقلكرده حاصلات
بغداى چاودار پنج قونجو (سيسام) كول بوييا
چوغان ايسك ياموق وسبزوات وميوه در
حيوانات دخى بسنور

اكثرقالار خانلغكدر خيلى واردات كتير
«عوارض» ديدكلى هنگام محاذبه ده ويا برآفت
ظهورنده فوق العاده طويلان اعانه اولديغندن
بو قلم واردات مقننه دن دكل در
بو تحرى اوزرينه خيوه وارداتنى شوقدر تخمين
ايدم يلورز

فرانق —————

مطبع ويركوسى	۲ ۵۰۰ ۰۰۰
مرك	۵ ۰۰۰ ۰۰۰

ترکانلرک زکاتلری	۱ ۰۰۰ ۰۰۰
کاروان رسومی	۴۰۰ ۰۰۰
چفتلکات واورمانلر و قنالار و خس	۲ ۱۰۰ ۰۰۰
وهدا یا	
	<hr/>
	۱۱ ۰۰۰ ۰۰۰

قوه حریه

خیوه چول اورطه سنده واحات اولدیغندن
 موقعه استحکامات طبیعیه سی چوللاردر خارجدن
 بردشمنک بوچوللری کچوب خیسویه هجومی
 یک کوچدر موقعی بویله اولدیغندن آسیاده راحت
 ویرلیان عشرتار هپ بورایه دوکیلوب التجاء ایدرلر
 بناء علیه خیوه نفوسی کون کون تزیاید ایتمکدهدر
 خیوهک هر قصبه سی هر کوی هر چفتلکی
 حصارلیدر هر حصارک مازغاللری متارسلری

وفله لری وارد در هر حصار ایچنده مغازه لر
 دکر منلر و سیسام یاغی ایچون منکدر و مهمات
 موجود اولوب ایکی اوچیز آتلی بمجاهدی
 خیلی وقت بسلر بو حصارلرک انشاسی روسیه یه
 مقاومت ایچون اولمایوب محمد رحیم خان دن
 اقدام قبائل بیننده اتفاق اولمادیغی جهته
 باصغین قورقوسندن و حین انهمزاده ملجا آخاندن
 نشئت ایش در هپ حصارلر مربع اولوب
 دیوارلرینک قالینلیغی دیندن ۴ و دپه دن یارم
 آرشون در و ارتفاعی ۱۲ ذراع

بودیوارلر طاش قاریشق طیراقدن بناء اولمش در
 هپ دیوارلرک چورسی خارجدن طیراق طیاقلرایله
 تقویت اولمش در فقط مازغالر دیوارلرک
 وقله لرک دپه لرنده اولوب تفنک آتمق ایچون
 آیاق دوشه مه لری یوق بیلیم که حین مقاومت ده
 نردبان می قورارلر نه یاپارلر هر دیوارک طولی

۷۵ دن ۱۲۰ آرشونه قدر

هر حصارك هر گوشه سنده قله سی وار هی
 قله لك دپه لری قبه سی در

یوقاروده اشارت ایتدی کمز وجهله بو حصارلر
 آتلو حیدودلره قارشو یاپیش اولوب روسیه نك
 نظام عسکرینه طیاره مار مع مافیه ایشه یارار
 زیرا اطرافنه چایق خندقلر قازیلوب مئارسه
 ایاق دوشه مه لری یاپیله رق خیلی مقاومت ایدر
 برده تحصن ایدن آتلور کچه لری خروج ایله
 محاصرینه شدتلی باصفینلر یاپه بیلورلر

خیوه کرکنج کات سواد کورلیان
 شهرلری حصارلی درلر دیوارلرینك قالناغی

دیبدن ۷ و ارتفاعی ۸ ذراع بونلر کل ایله
 قاریشق ترابدن مبنی طپراق طپاق تعبیه لری

داخل دن قله لری واردر حصارلرک خارجدن
 استحکاماتی یوق آق سرای و خان قلعه سی

و دیگر شکار قصرلری هپ شرح ایتدیگمز
اصولده حصارلی در

بوکره (محرم ۱۲۹۰) روسیه عسکرینه قارشو
خیوه قلعه سنه خارجدن استحکامات و خندق
یاپدیلم و ۶۰ طوپ دیزدیلم روسیه میرالای
وینقوف دیرکه خیوه او یله مستحکم که اوروپانک
منتظم عسکرله آلاتنه دخی خیلی مقاومت ایده بیلور
خیوه نك موظف عسکری (سرباز) بیک نفر
خاصه دن عبارت لکن اوزبک و ترکمانلر
دائم سلاح قبولاند قلرندن محاربه ده حاضر
معلم عسکرلدر خیوه ده بوکون اوروپانک
یکی ایجاد قاره بنار یله مسلح اوچ بیک سواری وار
اوته دنبرو شجاعت و بسالت و تجربه ايله معروف
اولان یکتیلر محاربه ده «سردار» نصب اولنوب
معینه ویریلان فرقه ايله مأمور اولدیغی محله کیدر
نه وقت روسیه ايله محاربه اولور ایسه خیوه خانی

روسیه حدودنده کی قاره قالیپاقلری قیرغیرلری
 و ترکمانلری حرکته کتیرر بونلر هر طرفدن
 روسیه حدودینی اوروب یغما ایدرلر
 فی ذی الحجه روس عسکرینک اتراک اوزرنده
 بعض ترکمانلره محاربه سی جزئی شی در ده
 ایلر ولدجه اگرخان مقاومت ده ثبات ایدر سه
 روسیه لی نکه بیوک محاربه لره طتوشه جغی درکار
 اکلاشیلور و بلکه بخارادن مظفرالدین دخی
 قیام ایدر

فی محرم ۱۲۹۰ خیوه دن روسیه حدودنه
 اوتوزبیک قدر آتلو قالدیغنه دأر حوادث وار
 بو عده اینانیلور چونکه اللی سنه دنبرو خیوه
 خانلری عجم اوزرینه یوریدکده اوتوزبیک
 عسکر قالدیردیغی ثابت در قالدی که
 فوق العاده محاربه لرده خیوه خانی سارتلری
 وقاره قالیپاقلری دخی سلاحدیرر

خیوه ده پیاده عسکری یوق در (۱)
نون آسیانک روس پنجه سنه دوشمی پیاده
عسکرلری بولمادیغندن در خیوه آتلوسنه

۱ اوروپا لسانلرنده پیاده یه انفتری دیرلر
بعض قوله کوره بولمکنک اصلی عربی دن محرف
اندلس ده برخلیفه نك محاربده اسیر دوشدیکی
خبری دارالملکه کلدکه خلیفه نك قیزی شهرده
ایراق آچوب دلالر چاغردوب اهالینک اوکنه
وشه رنک پیاده میدان محاربیه کتمش غوغایی
تازانمش و باباسنی قورتارمش اندلس عربلری
بنت سلطانه علی الاطلاق فنت (بنت) دیرلردی
وقیر شوطریقه پیاده موجودی اولدیغندن
و پدری مقام تشکرده « عنفتی » دیدیکندن
انفتری اوروپا لسانلرنده پیاده عسکرینه
الطلاق اولمش

اوروپا آتلوری قارشو طوره مازر اوروپا
 آتلری بول بول یسه جک ایله تنبلش دیرلش
 وسواریلری صیق البسه ایله و ثقیل سلاحلره
 باغلانمش آغلش دیرلش اولدقلرندن خیوه نك
 یاوز آتلرینی و خفیف سواریسینی نه قوغاله سه
 طوته بیلور نه قاچسه قورتیلور

اگر آسیاده پیاده اصولی اولایدی اوروپا نك
 سیوری بو طین کیمکه و شراب ایچمکه آتشمش
 اولان الک منتظم پیاده سی آسیانك کوکسی
 باغری آچیق بالدیری چبلاق بهادرلرینه کوکس
 کرمزدی

خیوه ده طوپخانه فابریقه لری یاپان محمد رحیم ایدی
 فی ۱۲۳۵ استانبول دن جلب ایتدیکی طوبچی
 اوستاسی بو فابریقه پی اکمال ایتمش در
 خیوه ده باروخانه وار کلیتو باروت یاییلوب
 داخلده صرف وادخار و خارجده تجارت اولور

حقوق صحبت و انسانیت آرانسه افغانلیرک
 روسیه قارشو خیوه خانه امداد ایتلری لازم کلور
 زیرا خیوه خانلرینک افغان امراسنه خصوصاً
 شاه محمود ایتدکلری رعایت واعانه اونودیلحق
 ایشلردن دکلدر نه چاره که کابل امیری
 علی شیرانکلیر سایه سنده تأسیس دولت ایتدیکندن
 آنک اشارتیه حرکت ایدوب بشقه برشی یاپاماز

خاتمه

فرانسزلر فی ۱۲۷۷ سوریه ده قتلک
 قرداشلرینه غدر اوله جقمش دیو آیاقلاندیلر
 و «پارتیر» نغمه سنی چالهرق بیروته عسکر
 چیقاردیلر

انکلیر فی ۱۲۸۵ برایکی نفر تبعه سنی حبش
 حبسندن قور تارمق ایچون عسکر سوق ایتدی

بروقت مسلمانلرده اويله ياپمشلردى
 عموريدهده اسير دوشوب «وامعتصما»
 ديو فغان ايدن برمسلانك فريادى بغداددن
 ايشيدلدى وسكسان بيك سواری آنى خلاص
 ايجون اناطولويه كيردى
 آل عثمان دخى قريم محاربه سندهك هپدين
 قرداشلرينك ناله سنى ايشيديردى حتى اويله بر
 محاربه نك غائله لى زماننده بيله قندهار وكابل
 قاريشقلغنه قوه حربه ايله مداخله ايلدى
 لكن اوزماندن نبرو ايش دكشدى حاليا
 جامعلرده و مدرسه لرده كتابلرینی اوقیوب ایکی
 سوزلرینی بلله مکه اختصار ایده کلدیکمز علماء
 و حکمانك وطنلری اولان ماورای نهري روسیه لی
 استیلاء ایتدی استانبول روی تأسف بيله
 کوسترمدی
 اشته آسیای وسطی ده يالکز برخيوه خانلغی

قالشیدی اکاده روسیه عسکر کوندردی بزم
دیتزدن وقوممزدن وفاملیامزدن اولان ترک
مسلمانلر عجبانه حالده لر

کیمسه ایشتمک بیله استیمور

بتم کی عاجزک الندن نه کلور باری تاریخیلری
و بزمه کچن وموجود اولان علاقه لری اونودلماق
ایچون بیلدیگمی یازتم بویازدیغمدن فضله
خیومهتک باشنه نه کلورسه اوقویانلر بوکتابک
آخرینه الحاق ایتسونلر

تصحیح و علاوہ

صحیفہ ۲۱

قوندوز و قدس بازار لر کھنڈز محرفی اولہ جق

ص ۲۷

« جنوب ولایتندہ (چیان چان نانلو) بومحاربہ
اولورکن شمال ولایتندہ (چیان چان پلو) دخی
قان آقق دہ ایدی »

- شمال ولایتندہ (چیان چان پلو) بومحاربہ
اولورکن جنوب ولایتندہ (چیان چان نانلو)
دخی قان آقق دہ ایدی

ص ۳۱

« ترکستان والیسی قولباری و جنرال قوفاری »
- ترکستان والیسی جنرال قوفان طرفندن
بارون قولباری

صیغه ۳۵

- » بوا یکی یتاق بوینده نمایان در و بو یتاقله
 بوا یکی یتاق بوینده نمایان در دیور لر بو یتاقله

ص ۳۵

- » زیرابوندن التی یدی عصر اقدم اهل جغرافیا
 - و طقوزاون قرن مقدم مسعودی

ص ۳۵

- » نزهة المشتاق مؤلفری
 - نزهة المشتاق و مروج الذهب مؤلفری

ص ۳۶

- » دو کیلور مصبته قریب
 - دو کیلور روایتته کوره مصبته قریب

ص ۴۳

- » معلوم اسلام الله دوشان
 - معلوم که اسلام الله دوشان

خیوه کاتب چلبی خیوه ایله خیوق بشقه
 بشقه ایکی شهر زعم ایلدی حالوکه خیوق
 قاف ایله خیوه مغربی در برده وزیر شهرینی
 خیوه نك قارشو سنده دیو یازدی قالدی که
 ابوالغازی کرکاتنج ایله وزیر آره سی آلتی اغاچ دردیور
 تقریبا ۱۲ فرسخ ایدر

جرجانیه

بوراده جرجانیه قزوینی نك و کاتب چلبی نك
 و دیگر بعضیلرک یازدقلری کی قید اولندی لکن
 کتاب ختامنده خریطه یی یایارکن بعض شمه لر
 عارض اولدی تابعین و تبع التابعین و قتلنده
 قح او انسان خوارزم پایتختی «فیل» شهری
 نرده ایدی بلانری بوفیل شهرینی خوارزمک
 الک مستحکم قلعه لی مدینه سی اولق اوزره

وصف ایدر

یا قوت جیحون شرقیستند صوایله خراب اولش
برمنصوره شهری یازار واسم قدیمی فیل ایدی
کرکانبج بودر دیور

قانون واطوال و تقویم البلدان صاحببری
خصوصا طوسی و اولوغ بك کرکانبج دارالملک
ونو کرکانبج ناملریله ایکی شهر یازدیله

ابوالغازی ایسه خیوه خانی اولدیغی حالده
فقط بر کرکانبج ذکر ایدیور و موقعی آنلرک
نو کرکانبج ایچون یازدقبری درجه ده شرح ایلور
قالدی که اوروپالی شرق سیاحلری یکی کرکانبج
شهرینی خیوه قربنده رسم ایدیورلر

اشته بونلردن خلاصه اوله رق اکلام که
اوج کرکانبج اوله جق بری طوسی نك و اولوغ بكك
۹۴ درجه و ۳۰ دقیقه طول

(جرجان ۹۰ و مروه ۹۷ اولقی اعتباریله)

۴۲ و ۱۷ عرضه رسم ایتدکاری دارالملک
کرکانج که قدیم فیل و منصوره دیدکاری شهر
و اولق کرک

ایکنجی کرکانج ینه موخی الیهمانک ۹۳ و ۴۵
طول ده ۴۲ و ۳۵ عرضه کوستردکاری
نوکرکانج که ابوالغازینک بیلدیکی اورکنج بودر
فی ۹۸۴ جیحون اراله دنونسیله چولده قالمش
شمدی بودخی خراب .

اوچنجی کرکانج اوروپالی سیاحلرک خیه
قربنده کوستردکاری یقینلرده یاللمش کرکانجدرکه
صحیفه ۴۸ کرکنج صغری و کرکنج جدید
تسمیه ایدرک وصف ایلدیکنر شهر بو اوله جق در
ص ۵۰

» یزید بن مهلب خوارزمه غزایدوب
— لکن امیه بن عبدالله و صکره تئیه کی فیل
شهرینی قح ایتمک موثق اوله مادی کعب الاشقری

(بیت)

اعطتك فيل بايديها وحق لها
ورامها قبلك الفجاجة الصلاف
يبتده مرقوم يزیده تعرض ايدر
ص ۵۱

« اوغوزلرکه سيمون و جيمون آره سنده ساکن
اولورلردی »

مسعودينك غز و بلاذرى نك غوز يازديغي
بونلردر بونلرك ممالكنه اسلامدن الك اول غزايدن
متوكل على الله وقتده طاهر بن عبدالله ايدى
ص ۶۷

« خضرلى

- خضرايلى

٤٢

کر

و

ط

نو

فی

ش

قر

ا

ع

ه

د


ر

ز







مقدمه	۲
روسیه لی نك آسیای وسطی ده ترقیسی	۱۳
خوقند و بخارا و بدخشان و کاشغر	
خیوه موقعی	۳۲
اهالی	۴۰
خیوه تاریخی	۵۰
یادکار حکومتی و اوزبك خانلرینك	۵۸
سلاطین عثمانیه ایله مناسباتی	
و بو ونه دك چکن ۲۷ خان	
سكه و زراعت و صنعت و تجارت و مالیه	۱۰۶
قوه حریه	۱۲۰
خاتمہ	۱۲۷
تصحیح و علاوه	۱۳۰
ایکی خریطه	۱۴۵









3 1761 07139762 4